

Marker Sul

1

Sexlsir Gger Su Yuehal Ca Leil Arbosobo Ddei Ddar Biar Gger

¹ Arbosobo ddei ssor Yisu Zidu ddei ddar seirseir mel eine biar du lei beil. ² Hherdder xiezi^a Yirsaexlyal yar vaexr dae sul ber leil vaexr dae mel sael a nga. Arbosobo bbeix:

“Ni i dae la ddo a.

Ngo ngo ddei ddar bbeix gger su ca ddei leil miardal a,
hoba lei lol a, ni leil jjiumo bei zaxr gger lei lol nia.

³ Ca ar ddei a mipaerbbae gga ae dae a bbeix:

‘Seirpor ssilabox jjiumo zex giexl zaxr nia,
yar jjiumo zex ggu zzar zaxr nia,’ ”^b

eine bbeix a.

⁴ Ddar eil mel dax zox dae a, mipaerbbae gga ca leil sexlsir^c gger su ar

^a**1:2** *xiezi* Xiezi mel ca ar nga. Yaa Arbosobo ddei ddar mel ca leil biar gger. Halae arddolcar a arsae lerler nga var ca leil bbeix gger zaxr.

^b**1:3** Ddar eil qier Yirsaexlyal Sul 40:3 leil vaexr goxr a. Halcar zzirmar mel kebal mermi ssi a mel cassor-worssor mel yar leil i du a, jjiumo bei zaxr nia, ggu zzar zaxr nia. Arbosobo ca mel ddei zzirmar bei lei niazzir dae a. Yel cassor-worssor mel nixmox zzar bei har zaxr dae a Arbosobo dax bei mae nia.

^c**1:4** *sex/sir* Ca mel sexlsir a mel, yaa armael zuixl zza cexrssexl a, Arbosobo yaa leil ssoxrsuxl lol. Yisu si ho a, ca mel halae Yisu leil ddarzzi cexrssexl, yar dax bei mae dae. Ca mel sexlsir a mel, ajjix sser a

ddei ddux lei a; yar leil Yuehal mi. Yar ca mel leil nr seir mel zeixleixr bei nr ddo, seirseir bei nia, sexlsir nia, yel Arbosobo dder yaa leil ssoxrsuxl var biar gger. ⁵ Yoxrtaexl mermi Yiluxlsaler zzi gga su ca nei Yoxrtaexl mermi kebal cirmaex-hanga su ca mel dder Yuehal dax lei a, yaa armael ddei zuixl mel cexrssexl, yel yar dder Yuedaxl lazzarmo gga yaa leil sexlsir gger. ⁶ Yuehal veixr dae pia mel loxltoxr me bei teixl lei, maelsael nael sur zzi bei teixl lei, zzorlabox nael zaxbiul nei bbiurvi yir zzor. ⁷ Yar ca mel leil biar gger a bbeix: “Ngo giedae mel halae bir ngo leil vaer ca ar ddei lei nia seir. Ngo olmer dae a yar leil qixnexsael pe gger a lei pe gger nr piar. ⁸ Ngo ajjix sser a nia leil sexlsir gger, nael yar mel Arbosobo ddei Xiu ddei sser a nia leil sexlsir gger nia.”

Yisu Sexlsir Nei Sardaxl Te Yar Leil Sixr I

⁹ Halcar Yisu Jialixllixl mermi Naxrsalexl kax gga cirdae lei a Yuedaxl lazzarmo gga Yuehal dax sexlsir lei. ¹⁰ Yisu ajjix gga ddeix lei a qie, neixleixrsael merlabbor ddei ggapu ggie mia a, Arbosobo ddei Xiu ddei dderbel sael a bbiu zeil lei a yar leil nor deix dae a. ¹¹ Yoxl merlabbor bbeix dae qiurte ar ddei a bbeix: “Ni mel ngo ddei Ssorzil-ssorya a; ni ngo leil ggese lol!”

¹² Arbosobo ddei Xiu ddei dder Yisu leil zul a mipaerbbae gga ssi lol.

¹³ Yel Sardaxl^d te mel yar leil halmaex licei ni sixr i a. Yar yirvu-nilhax

sexlsir. Cirmemel a nael leixrhher ddei ajjix dex du lei a oldde leil dox deix gger. Cirmemel a nael ajjix gga niuxl gger.

^d**1:13** *Sardaxl/Sardaxl* ddei yilsi mel dder Arbosobo leil dir su.

Arddol-cirsil halleix Sardaxl te mel tisir ar ddei a. Giedae yar kebal tisir ar mel leil hier dae a Arbosobo leil dir a, Arbosobo dder yar leil faxr a. Yar yarzi gexrddo loxr a. Yar Arbosobo leil nei cassor-worssor leil vuxryixr. Yar mel dder neir ddei zzirmar.

mel dax cirgo a hher, tisir^e yar leil visser.

Yisu Ngolbelsu Ca Liller Leil Ae A Yar Dax Mae Lei Lol

¹⁴ Yuehal leil ge ji dae ho a, Yisu Jialixllixl mermi ssi a, Arbosobo ddei ddar biar gger ssi a bbeix: ¹⁵ “Nixixl ddei bbi ho a. Arbosobo nia ddei zzirmar bei lei du a. Yel nia nr seir mel zeixleixr bei nr ddo a; seirseir bei nia, ngo leil biar dae ddar seirseir mel ddarzzi nia.”

¹⁶ Yisu Jialixllixl mermi neixvi qier leil ssi dae a, Ximexr nei Adaexrlixl yaa nr hieni leil mia a. Yaa mel ngolbelsu a. Yaa jiajia ngol bel ddei neixvi gga piar ji a ngol bel dae. ¹⁷ Yel Yisu yaa leil bbeix: “Nia ngo dax mae lei ddo a. Nia mel ca mel leil bel su a. Hherdder bbeix, nia ca mel leil hier si lei a ngo dax mae lei lol,” eine bbeix a. ¹⁸ Yel yaa qixrqixlqixr ngol bel ddei lei nr li yar dax mae a.

¹⁹ Yisu zeixleixr ssi a, yoxl Xibirtaexl ddei ssor Yargel nei Yuehal yaa nr hieni leil mia a; yaa cuaxr ddei leil ngol bel naexrbe dae. ²⁰ Yisu nialngasael yaa leil ae a yar dax mae lei lol. Yaa dder yarbbor dax nei yaa qie dae wormusu mel dax lei nr hher, Yisu dax mae a.

Yisu Neir Ggaxr

²¹ Yaa Jiabaernoxxr kax gga lei ci a. Wornol nixixl cir ni Yisu Yoxrtaexl su mel Arbosobo ddei sulzzaggie gga ca leil mul gger. ²² Nael yar ddar bbeix dae mel, Arbosobo yar leil bbeix lol a yarzi quexrlixl zza, Arbosobo ddei sulsaexlsu ca mel bbeix dae mel le-nr-sel, yel ca mel lei yar yaa leil mul gger dae mel leil yarzi murgur. ²³ Yoxrtaexl su mel Arbosobo ddei sulzzaggie gga neir xiex dae ca ar ddei zza. Yar worcixl-worni ae dae a bbeix: ²⁴ “Naxrsalexl su ca Yisu, ngua ni dax azo guaxrzoxr? Ni ngua leil

^e**1:13** *tisir* Tisir mel ca nr nga. Yaa mel merlabbor zei lei a Arbosobo ddei ddar ca leil bbeix gger su. Yaa Arbosobo leil zi, visser. Yaa seir ar mel a.

ggaxr teixl gger a cirse-cirsil lei ngua leil ser lei nga nga? Ni arseir a ngo saexl. Ni mel Arbosobo dax lei seirceix-seirmaer hal ddei nga a.”

²⁵ Nael Yisu yar leil hie a bbeix: “Arjjiuljjiu a hher dae a, ca eil ddei ggecir gga ddux lei!” ²⁶ Yel neir te dder ca hal ddei leil arleixr caerfo lol a, worcixl-worni ae dae a ddux lei a.

²⁷ Ca maelmaerjgia lei yarzi murgur a, zzicarzzi leil biex a bbeix: “Yil! Arsae nga a leir? Ca eil ddei mul gger dae mel niul zeixleixr lei bbejjiur nr seix. Yar yarzi quexrlixl vaer. Ddar ar qier bbeix a neir lei ggaxr teixl lei xie bbe.” ²⁸ Yel Yisu bei dae mel dder Jialixllixl mermi zzarvul-zzarmae lei biar ci a.

Yisu Ca No Su Cirke Ggukor Gger

²⁹ Yaa Yoxrtaexl su mel Arbosobo ddei sulzzaggie xi gga ddux a, Yargel nei Yuehal dax cirgo a Ximexr nei Adaexrlixl yaa ake ssi a. ³⁰ Yisu ddir ci a, ca mel Ximexr yoxrmo safaex a yixr dae yar leil bbeix gger a. ³¹ Yel Yisu dder ddir a Ximexr yoxrmo leixrhher ddei leil gga gex dae a, yar leil gga du lei a. Sa ddei dder nr faex a; yar dder Yisu leil visser.

³² Mercixl car a ca mel cirza-hanga no su ca nei neir xiex dae ca cirke hier dae a, Yisu dax hier mal lei a. ³³ Zzi gga ca maelmaerjgia lei Ximexr hhexr alddur ggucirmi pex gex dae a. ³⁴ Yisu dder cirza-hanga no su ca cirke ggukor gger a; yoxl neir lei cirke ggaxr teixl gger a. Nael neir mel mel yar arseir a saexl a, yar dder neir mel leil ddar nr bbeix lol.

Jialixllixl Mermi Arbosobo Ddei Sulzzaggie Gga Arbosobo Ddei Ddar Biar Gger

³⁵ Giedae cirnehe merteir niazzir dae a qie, Yisu dder ha du lei a, mipaerbbae gga ssi a Arbosobo dax ddar biar ssi. ³⁶ Ximexr nei yar carbeix mel dder yar leil zo ssi, ³⁷ yaa yar leil mia a dder bbeix: “Ca mel ni leil zo dae.”

³⁸ Nael Yisu zzael yaa leil ddarkoxl a bbeix: “Niul naer ggie kaxmo mel gga ssi a, ngo ca mel leil Arbosobo ddei goxr ddei biar gger ssi nia. Arbosobo ngo leil miardal a mel hherdder eine bei ssi lol arddeir a.”

³⁹ Yel yar dder Jialixllixl mermi cirmaex-hanga Yoxrtaexl su mel Arbosobo ddei sulzzaggie xi gga Arbosobo ddei ddar biar gger, halae neir ggaxr.

Nopae Su Ca Ddei Leil Ggukor Gger

⁴⁰ Nopae su ca ar ddei a Yisu dax lei a, yar leil cizixl gger dae a bbeix: “Ni ngo leil kor^f lol niazzir arddeirnga a, ngo leil kor lol var.”

⁴¹ Yisu yar leil zoxlnixr a dder leixrhher ddei cei teixl a yar leil ta ssi a bbeix: “Nga ddo, ni kor a!” ⁴² Yel ca hal ddei cirleixr dder no-nr-pae, kor a.

⁴³ Yisu dder yar leil ssi lol a; nael yar leil zabbar seilseir a miardal a bbeix: ⁴⁴ “Ni eil mel arseir leil lei bbeix gger nr ddo, ni Moxrxi vaexr dae Lixlfaxr leil miardal dae mel dax zox dae a, Arbosobo leil zi su mel dax ssi a, yaa leil ni kor ho a i lol, halae ni yaa leil zilabox gger a yaa leil Arbosobo leil zi gger lol, yel ca mel dder ni kor ho a saexl.”^g ⁴⁵ Nael ca hal ddei zzael eil mel cirmaex-hanga lei biar ci gger a, yel Yisu daxmeix

^f**1:40** kor Xilaxl ddar “kor” nr bbeix; “seibeix” bbeix.

^g**1:44** Nopae su Yisu leil qie a yar leil ggukor gger lo a, yar dder seibeix a. Arbosobo ddei Lixlfaxr leil bbeix 1) nopae su mel sei-nr-beix, 2) yaa Arbosobo leil zi ggie xi gga lei ddir nr ddo, 3) yaa lei Arbosobo leil zi ssi nr ddo, 4) ca mel nopae su leil ta a mel dder sei-nr-beix loxr a. Yel Yoxrtaexl su ca mel zzir dae a nopae su mel si dax hher naer nr ddo; yaa lei nopae su dax naer nr yuex, yaa leil ta nr yuex. Nael Yisu nopae su leil ggukor gger a yar leil seibeix lol. Mixrsuxljil Sul 5:1-3 leil, Lixlweixljil Sul 13-14 leil, halae Semixljil Sul 24:8 leil biar dae.

zzi gga ddir nr cexr a dder mipaerbbae dax naer ggie hal mel gga hher dae lalnga a. Nael cirmaex-hanga ca mel halae yar dax lei.

2

Taba Dae Ca Ddei Leil Kor Lol

¹Nr ni sael goxr ho a, Yisu yoxl Jiabaernoxt kax gga jjixr ci a; yel ca mel yar xi gga hher dae bbejjiur a qie, ²ca cirke a yar dax lei, alddur ggucirmi lei hher bbi a. Yisu dder yaa leil Arbosobo ddei ddar biar gger.

³Yar biar dae car, ca liller a goxrzeix ar ddei sser a, taba dae ca ar ddei a leil bbax dae a yar dax lei. ⁴Nael ca yarzisael miur, yel yaa Yisu dax naelnaer a bbax mal lei nr cexr. Yel dder xipaebbor maex ddeix a, ngier zzu caexr pixl gger a ca ddei leil nei goxrzeix ddei cirgo a zalbbor diux zeigger a. ⁵Yisu yaa yar leil yarzi ddarzzi mia a dder taba dae ca ddei leil bbeix: “Albor, ni ddei zuixl mel ssoxrsuxl ho a.”

⁶Arbosobo ddei sulsaexlsu nnel sael a halmaex cux dae a nixmox zzar xiar dae a bbeix: ⁷Ca eil te arseir a leir? Yar Arbosobo lar bbeix ddo ddar mel bbeix bel. Arbosobo larnei ca ddei zuixl mel ssoxrsuxl cexr!

⁸Yisu ddei xiu yaa nixmox zzar azo xiar ji dae saexl a dder yaa leil bbeix: “Nia arsaenga a nixmox zzar eine xiar ji dae? ⁹Ngo ca eil ddei leil bbeix: ‘Ni ddei zuixl mel ssoxrsuxl ho a’ eine bbeix a bbeix so? Bbeixsael bbeix ‘Ni ha du la a ssi ddo a’ eine bbeix a bbeix so? ¹⁰Nael ngo nia leil Ca Ddei Ssor^h ddei middurbbor ca mel ddei zuixl mel ssoxrsuxl quexrlixl zza saexl lol nia.” Yel Yisu dder taba dae ca ddei leil bbeix: ¹¹“Ngo ni leil miardal, ha du la, ni ddei goxrzeix ddei vei dae a ake jjixr ddo a.” ¹²Yel ca hal ddei dder ha du lei a, lixlixlilix yar ddei goxrzeix ddei vei dae a ca mel meixsaer qier leil ssi teixl si a; yel ca mel lei yarzi murgur, yaa dder

^h2:10 *Ca Ddei Ssor* Yisu mel armael leil “Ca Ddei Ssor” bbeix.

Arbosobo leil bbeix zae gger a bbeix: “Ngua zeixleixr lei eil mel sael a mia nr seix!”

Lixlweixl Leil Yisu Dax Mae Lol

¹³ Yisu yoxl neixvi qier leil ssi dae a, ca mel yar dax lei a, yar dder yaa leil mul gger. ¹⁴ Yar zeixleixr ssi a, Yallexlfei ddei ssor Lixlweixl suix se ggie cux dae mia a. Yisu dder yar leil bbeix: “Ni ngo dax mae lei,” bbeix a yar dder ha du lei a Yisu dax mae a.

¹⁵ Giedae Yisu mel Lixlweixl hhexr ake almeixr zzor ssi, kebal suixsesu ca nei zuixl zza su ca cirke a Yisu nei yar dax mae dae su ca mel dax cirgo a zzor. Yisu dax mae dae su ca seirseil ar ke zza. ¹⁶ Nael Farlixlsaexl ca mel gga Arbosobo ddei sulsaxlsu ca ar mel a Yisu yaa dax cirgo a zzo zzor ggie mia a, yel dder Yisu dax mae dae ca mel leil bbeix: “Yar giel arsaenga a suixsesu nei zuixl zza ca mel dax cirgo a zzorzzor-ddadda leir?”

¹⁷ Yisu bbejjiur a dder yaa leil bbeix: “Nr no su ca mel no i nr ssa, no su mel larnei no i ssa. Ciryoxr a nga, ngo lei a mel ca seir mel leil zo nr nga a nei; zuixl zza ca mel leil zo lei arddeir a.”

Nr Zzor Ddei Leil Biar

¹⁸ Eine ar ni a Yuehal dax mae dae su ca mel nei Farlixlsaexl ca mel zzor lei nr zzor bei dae. Ca ar mel a Yisu leil biex a bbeix: “Yuehal dax mae dae su ca mel zoxlzoxl a zzor lei nr zzor, Arbosobo dax ddar biar; Farlixlsaexl ca mel lei eine nga. Nael ni dax mae dae su ca mel arsaenga a eine nr bei?”

¹⁹ Yisu yaa leil bbeix: “Mixlyixrsixl nei yar carbeix mel halae cirgo a hher dae seir car, yaa arsae nr zzor bei var bbeixleir? Mixlyixrsixl ddei yaa dax cirgo a hher dae seir mel yaa nr zzor bei nr ddo. ²⁰ Nael nixixl ddei ci a mel mixlyixrsixl ddei leil mel hier si du a. Halcar a mel, yaa dder

zzor lei nr zzor.”

²¹ Yisu yoxl bbeix: “Arseir lei mae sixl mel pia ggiexrtaex leil naexrbe su nr zza. Nr nga a mae sixl ddei soxr xixl a mel pia li ddei leil si xiaxr gger var, yel bbaer dae ggie gielgiel bbaer dax var. ²² Halae arseir lei jiajia goxr teixl lei puxrto zzubbaer mel sur zzi bei teixl lei daexlzi li gga ji su nr zza. Eine nga a mel daexlzi ddei bbaer zil a mel puxrto zzubbaer ddei lei ssu teixl lei a; puxrto zzubbaer jilabox ddei lei xiaxr a. Jiajia goxr teixl lei puxrto zzubbaer mel dder sur zzi bei teixl lei daexlzi sixl gga ji nia.”

Wornol Nixixl Cir Ni Leil Biar

²³ Wornol nixixl ar ni a, Yisu nei yar dax mae dae ca mel so mi mel dax ssi gel a, yar dax mae dae ca mel ho ssi ho so ne ngaxl lel, ²⁴ yel Farlixlsaexl ca mel mia a dder yar leil bbeix: “Ni arleixr i, ni dax mae dae ca mel arsaenga a wornol nixixl miar bei nr ddo cir ni miar bei leir?”

²⁵ Yar yaa leil ddarkoxl a bbeix: “Daxlweixl nei yar dax mae dae ca mel almeixr meixr a arsae lerler bei mel Arbosobo Ddei Sul ber leil vaexr deix dae. Nia eil mel leil zza goxr a zzarmar? ²⁶ Yalbiryalta Arbosobo leil zi su vaer zzir ddei bei halleix, Daxlweixl arsae Arbosobo ddei xi gga ddir a, Arbosobo leil zi dae aba mel vei lel, yoxl yar dax cirgo a ca mel leil zzor lol. Aba eil mel Arbosobo leil zi su lar zzor ddo, kebal ca zzor nr ddo.”

²⁷ Yisu yoxl bbeix: “Wornol nixixl cir ni mel ca leil wornol lol a bei arddeir a. Nael ca mel mel wornol nixixl cir ni leil weix a gol dae nr nga.

²⁸ Ca Ddei Ssor ddei mel Seirpor a; yar lei wornol nixixl cir ni ddei Seirpor a.”

3

¹ Yisu yoxl Yoxrtaexl su mel Arbosobo ddei sulzzaggie xi gga ddir a, ca leil mul gger ssi. Halmaex gga mel leixrhher ar bbor noddexr dae ca ar

ddei zza. ² Yel ca mel Yisu wornol nixixl cir ni ca leil no ggukor gger gger bbe i dae. Yar ggukor gger arddeirnga a, yar leil goxl ssi niazzir. ³ Yisu leixrhher noddexr dae ca hal ddei leil bbeix: “Ha du la a, agala gga ngier dae.”

⁴ Yoxl ca mel leil biex a bbeix: “Wornol nixixl cir ni seirseir bei nia bbeixsael nr seir bei nia? Ca leil jiuxl nia bbeixsael ca leil ke nia? Arddol ddei saelnei bei ddo?” Nael yaa maelmaerjjia lei ddar-nr-koxl.

⁵ Ca mel nixmox taex gex a Yisu yarzi cix, yel yar dder sirzzizzimo zaza-lili ca mel leil i dae a, ca hal ddei leil bbeix: “Leixrhher bbor cei teixl la!” Yar leixrhher bbor cei teixl lei a dder kor a. ⁶ Farlixlsaexl ca mel dder ddux a, yel Silixl vaervaerpor dax mae dae ca mel dax cirgo a Yisu leil arsae bei zil gger nia zzubbe ssi.

Neixvi Qier Leil Hher Dae Ca Mel Leil Biar

⁷ Giedae Yisu nei yar dax mae dae ca mel neixvi qier leil ssi ci a, Jialixllixl mermi su ca seirseil ar ke lei a yar dax mae lei. ⁸ Halae Yoxrtaexl mermi su, Yiluxlsaler zzi gga su, Yirturmaer mermi su, Yuedaxl lazzarmo maelleil halae Tuiloxr zzi gga su nei Siduixl zzi gga su, ca cirke a mel Yisu bei dae cirza-hanga eil mel leil bbejjiur a dder Yisu dax halmaex lei a. ⁹ Ca mel yarzisael miur, yel Yisu dder yar dax mae dae ca mel leil miardal a, yar leil cuaxr ssor ar jiaxl zo zaxr gger si lei lol. Nr nga a ca mel yar leil bbex dae a. ¹⁰ Yar mel canosu cirke leil ggukor gger a, yel no su ca hazza lei dder yar dax bbex mal lei a yar leil ta niazzir. ¹¹ Neir mel yar leil ha mia a mel dder middur ddei leil puxr gex dae a worcixl-worni ae dae a bbeix: “Ni mel Arbosobo ddei Ssor a.” ¹² Nael Yisu yaa leil miardal a, yar arseir a bbeix nr ddo eine bbeix.

Yisu Ca Ceinirmo Leil Tiur A Yaa Leil Miardal

¹³ Yisu wordabbor ddeix a, yar nixmox zzar xiar ji har dae ca mel leil

cirgo a ae mal lei, yel yaa dder yar dax halmaex lei a. ¹⁴ Yar dder yaa ca mel gga ceinirmo tiur teixl lei a, yaa leil zoxlzoxl a yar dax cirgo a hher dae lol, yoxl yaa leil miardal teixl a Arbosobo ddei ddar ca leil biar gger ssi lol. ¹⁵ Halae yaa leil neir ggaxr teixl xie quexrlixl gger. ¹⁶⁻¹⁹ Ca eil ceinirmo gga mel hherdder: Ximexr Birdaexrⁱ halae Xibirtaexl ddei ssor Yargel nei Yuehal, yoxl Adaexrlixl, Feilixl, Badoloxrmaer, Martaexl, Domar, Yallexlfei ddei ssor Yargel, halae Daxrtaexl nei Loxrmar goxrjia leil dir su Ximexr; halae Yisu leil vurlitsu Jialuxl mermi su Yoxrdaxl. Yisu yoxl Yargel nei Yuehal leil Balnirqir mi gger. Balnirqir ddei yilsi mel dder almer er lol su sael a nga.

Yisu Leil Nei Bixrsipur Leil Biar

²⁰ Yisu xi ar giex gga ddir ci a, ca maelmaerjia yoxl yar dax halmaex pex mal lei a, yar nei yar dax mae dae ca mel almeixr lei zzor nr cexr a.

²¹ Ca mel Yisu tae ho a eine bbeix, yel yar ake ca hhexr bbejjiur a dder Yisu leil gga xixl si a.

²² Yiluxlsaler zzi gga lei Arbosobo ddei sulsaexlsu ar mel a nael bbeix: “Neir zzirmar Bixrsipur te^j yar leil xiex a. Yar neir ggaxr a mel neir zzirmar leil koxl dae a ggaxr arnar mei!”

²³ Yel Yisu dder yaa leil ae si lei a bir dae a bbeix: “Sardaxl^k car Sardaxl

ⁱ**3:16-19** *Ximexr Birdaexr* Yisu yoxl Ximexr leil Birdaexr mi gger, yel yar mi nnel zza.

^j**3:22** *Neir zzirmar Bixrsipur te* Arddol-cirsil halleix neir zzirmar te mel tisir ar ddei a. Yar kebal tisir ar mel leil hier dae a Arbosobo leil dir a, Arbosobo dder yar leil faxr a. Yar yarzi gexrddo loxr a. Yar Arbosobo leil nei cassor-worssor leil vuxryixr. Neir zzirmar te leil Sardaxl ae.

Martaexl Sul 13:38-40 nei Qirsixlluxl Sul 12 leil Sardaxl te leil biar dae.

^k**3:23** *Sardaxl* Sardaxl ddei yilsi mel dder Arbosobo leil dir.

mel arsae ggaxr?”²⁴ Goxrjia ar ddei a zzicarzzi dax zex arddeirnga a mel, goxrjia ddei lei xiaxr var;²⁵ ca cir hhexr a zzicarzzi dax zex arddeirnga a lei, ake ddei lei xiaxr var;²⁶ Sardaxl car Sardaxl zex a mel, yar ddei goxr ddei arsae zza dae var bbeixleir?²⁷ Bir dae a bbeix, ca yarzi sexr ar ddei a yar ddei ake ddei leil su dae a mel, kebal ca mel yar ddei zzaegu arsae su ssi cexr? Nrbba dder hoba yar leil neixl gex du lei a sael su ssi a nga arnar.²⁸ Yisu yoxl bbeix ngo nia leil yarzi bbeix gger: “Ca mel ddei zuixl maelmaerjia nei ca leil bbeix vuxryixr dae ddar maelmaerjia lei, Arbosobo ssoxrsuxl;²⁹ nael ha Arbosobo ddei Xiu ddei leil bbeix vuxryixr a mel, Arbosobo dder cirse-cirsil lei yar leil ssoxr-nr-suxl, yar cirse-cirsil lei zuixl zza.”

³⁰ Yisu eine bbeix a mel yaa bbeix: “Neir zzirmar Bixrsipur Yisu leil xiex a,” bbeix a nga arddeir a.

Yisu Yarma Nei Yar Ddei Arzzi-nimar Leil Biar

³¹ Halcar a malmal Yisu yarma nei yar ddei arzzi-nimar mel lei a, yaa zalbbaer ngier dae a, ca leil qie a Yisu leil ae ssi lol.³² Ca seirseil ar ke a mel Yisu leil pex gex dae a cux dae, yel ca mel Yisu leil bbeix gger a bbeix: “Niama nei ni nimar nimo mel ni leil zo lei a, yaa zalbbaer ngier dae.”

³³ Yisu ddarkoxl a bbeix: “Arseir ngama, arseir ngo ddei arzzi-nimar a neil?”

³⁴ Yel dder zaza-lili cux dae ca mel leil i dae a bbeix: “I ddo a. Eil mel mel hherdder ngama nei ngo ddei arzzi-nimar mel nga a.³⁵ Ha Arbosobo miardal dae mel dax bei mae dae su ca mel, hherdder ngama nei ngo ddei arzzi-nimar arzzi-nimo mel nga a.”

Silmo Xiu Ddei Leil Bir Dae A Biar

¹ Yisu yoxl neixvi qier leil hher dae a ca leil mul gger dae. Nael ca seirseil ar ke a yar leil pex gex lei a, yar dder cuaxr ar jiaxl leil ddeix a cux dae lalnga a. Cuaxr jiaxl mel neixvi gga nor ji dae, ca mel nael neixvi qier leil hieltebbor ngier dae. ² Yisu dder bir dae a yaa leil cirza-hanga cirke mul gger, yar mul gger dae car a yaa leil bbeix: ³ “Nia noni dae la, silmo xiu su ca ar ddei a mel silmo xiu ssi. ⁴ Nael yar xiu dae car, cirmelmel a nael luzzi ddei leil xiu deix dae a, ngax mel bbiu mal lei a ggux lel ji jjia a. ⁵ Cirmelmel a nael, legelbbe teixlleil mizzo nr neixl ggie xiu deix dae a, yarzi ner yoxryixl. ⁶ Nael yarji ho nr var a merni ddux lei a, lexl hie zzu gger a. ⁷ Cirmelmel a nael alcur cili gga xiu ji dae a, alcur mel ner teixl lei a vix zil gger a. Yel yarsaer niar teixl lei nr xie. ⁸ Halae cirmelmel a nael nilhar naxrcixl gga xiu ji dae a dder ner vaer a. Yel loxlmoxr saer xiu ji dae mel socei peix niar teixl lei lei zza, qiuxlcei peix niar teixl lei lei zza, cirxiu peix niar teixl lei lei zza.” ⁹ Yisu yoxl bbeix: “Nia zabbar seirseir a noni dae nia.”

Arsaenga A Bir Dae A Biar

¹⁰ Ca nr zza car, Yisu dax mae dae ca mel nei yar miardal dae ca hal ceinirmo yar leil bir dae a bbeix dae eil mel azo yilsi a biex. ¹¹ Yisu dder yaa leil bbeix: “Arbosobo ddei goxr ddei leil biar dae halleix arseir lei nr saexl hal mel, eilleix nia leil saexl lol, nael kebal ca dax mel bir dae a bbeix, ¹² yel

yaa dder i bbeix naer i a lei azo yilsi a nr saexl,
noni bbeix naer noni a lei, noni wo nr xie.
Nr nga a mel yaa huixrsoxr arddeirnga a mel,

ngo dder yaa leil ssoxrsuxl var.”¹

Bir Dae A Bbeix Dae Mel Azo Yilsi A Biar

¹³ Yisu yoxl yar dax mae dae ca mel leil bbeix: “Nia bir dae a bbeix dae eil ddei ddei yilsi nr saexl a ngo? Eine nga a mel nia bir dae a bbeix dae maelmaerjia arsae saexl var bbeixleir? ¹⁴ Silmo xiu su hal ddei xiu dae silmo mel mel hherdder Arbosobo ddei ddar mel nga a. ¹⁵ Luzzi ddei leil xiu teixl si silmo hal mel mel hherdder ca mel Arbosobo ddei ddar noni ho a, neir Sardaxl te lei a, yaa nixmox zzar noni ji dae ddar mel su si a. ¹⁶ Nilhar woxrke legelbbe zza ggie xiu deix dae silmo mel nael dder ca mel Arbosobo ddei ddar mel noni dil a yarzi ggese, ¹⁷ nael nixmox zzar ji nr ver, cirleixr a ddarzzi, yaa Arbosobo ddei ddar mel leil ddarzzi a azo lerler nr seir pex dae nei ca mel yaa leil bixr a dder zeixleixr lei ddar-nr-zzi a. ¹⁸ Alcur cili gga xiu ji dae hal mel nael dder, ca mel Arbosobo ddei ddar noni ho a, ¹⁹ nael giedae yaa nixixl ddei arsae goxr nia zoxrzixr, zzirbae meixr nei kebal cirza-hanga eil mel leil xiar doxr a, yaa dder Arbosobo leil ddarzzi su yarzi hhel ca loxr nr var. Hherdder yarsaer niar nr var yarzzei mel sael a nga. ²⁰ Micir seir ggie xiu ji dae mel nael dder ca mel Arbosobo ddei ddar mel noni ho a, yaa nixmox zzar ji dae a. Halae yaa Arbosobo leil ddarzzi su yarzi hhel ca hal mel loxr a. Hherdder loxlmoxr zzei mel loxlmoxr saer yarzi miur niar teixl lei sael a nga. Xiu ji dae mel socei peix niar teixl lei lei zza, qiuxlcei peix niar teixl lei lei zza, cirxiu peix niar teixl lei lei zza.”

De Ddei Leil Biar

²¹ Yisu yoxl yaa leil bbeix: “Arseir de doxl a mel bellerzzi woxrke bbeixsael yixrgguci woxrke doxl ji su zza bbeixleir? Arseir leil de doxllabox ddei leil doxl deix zzarmar? ²² Arddolcar a, kerzi dae

¹4:12 Yirsaexlyal Sul 6:9-10 leil vaexr dae.

maelmaerjia lei bbeix teixl lei nia, halae cirza-hanga ca leil nr saexl lol mel lei maelmaerjia ca leil saexl lol nia. ²³ Yel nia zabbar seilseir a noni dae nia.”

²⁴ Yar yoxl yaa leil bbeix: “Nia bbejjiur wo mel zabbar seilseir a xiar nia. Nia zabbar seilseir a noni dae a ho bei ho saexl dax niazzir a mel Arbosobo dder ho bei ho nia leil hanol saexl dax lol. ²⁵ Ha noni wo xie su ca ddei leil mel zeixleixr biar gger dax nia, yar leil saexl dax lol nia; ha noni dil nr ddo su ca ddei leil mel, yar noni wo dox lei su si nia.”

Bir Dae A Loxlmoxr Arsae Ner Du Lei Biar

²⁶ Yisu yoxl bbeix: “Arbosobo ddei goxr ddei mel dder ca mel middurbbor loxlmoxr sil xiu sael a nga. ²⁷ Xiu ji ho a ca hal ddei zoxlzoxl sael a eilmerxixl nael yixr, eilnirggu nael ha du lei a miar bei ssi, silmo mel lei dder zzizzi zzizzi a zzae teixl lei a ner du lei a. Nael ca hal ddei silmo mel arsae ner du lei a yar nr saexl. ²⁸ Loxlmoxr mel mel hherdder yar ddei yar ner du lei, ner vaer ho a nael ne ddux lei a. Ne ddux lei ho a nael zzizzi zzizzi dder mo bbi a. ²⁹ Loxlmoxr saer mel mo ho a, se zi ci a, ca hal ddei dder meixlkor sser a caer xixl lei nia.”

Yisu Bir Dae A Silmo Yelye Ar Taex Leil Biar

³⁰ Yisu yoxl zeixleixr bbeix, “Niul Arbosobo ddei goxr ddei azo lesel bbeix nia bbeixleir? Ngo arddolyox dax bir dae a bbeix nia neil?

³¹ Arbosobo ddei goxr ddei mel varpei sil ar taex lesel. Dae ji car a silmo eil taex bir arddolyox silmo leil lei ye leixl bbeixarnar, ³² nael ner du lei a mel vaervaermo ar zzei loxr a, halae yarcaxlleixr caxl teixl lei a. Ngax mel bbiu mal lei a avixsaer ggje cide bei lei.”

³³ Yisu mel yaa leil eil mel sael a bir dae a biar dae cirke mul gger a. Arsae biar a yaa noni wo xie mel dder arsae biar gger. ³⁴ Bir dae a nr biar arddeirnga a mel dder yaa leil azo lei biar nr gger. Kebal ca nr zza

car a nael bir dae a biar dae ddar mel azo yilsi a yar dax mae dae ca mel leil biar gger.

Mersi Nei Neixvi Lei Yisu Ddei Ddar No

³⁵ Hal cir ni mercixl a Yisu yar dax mae dae ca mel leil bbeix: “Niul neixvi hal bbu leil gger,” eine bbeix. ³⁶ Yar dax mae dae ca mel dder ca mel dax nr hher cuaxr jiaxl leil ddeix lei a. Yisu nael cuaxr jiaxl leil hher deix dae ho a, yaa dder cirgo a neixvi hal bbu leil ssi a. Kebal cuaxr ar mel a lei yaa dax mae dax ssi a. ³⁷ Nael neixvi teixlleil cirleixr dder mersi daxlgaxl jia du lei a. Ajjix ddei lei daxlgaxl le du lei a, cuaxr jiaxl gga ddir lei bbi niazzir dae a. ³⁸ Yisu zzael halae cuaxr maeldae ddei dax olggerddar ar ddei leil koxl dae a yixrmeixljjiu dae. Yar dax mae dae ca mel yar leil ae zucur gger a bbeix: “Sulmulu, niul si niazzir dae a. Ni arsaenga a nr guaxr?”

³⁹ Yisu zucur a dder mersi ddei leil hie a bbeix, “Tor nr jia hor.” Yoxl neixvi ddei leil bbeix: “Nor dae.” Yel mersi ddei dder nr jia a; neixvi ddei lei nr le nor dae a.

⁴⁰ Yar dder yar dax mae dae ca mel leil bbeix: “Nia arsaenga a eine gexr leir? Nia halae ngo leil ddar-nr-zzi a ngo?”

⁴¹ Yar dax mae dae ca mel zzael gexr zildu a dder zzicarzzi dax bbeix: “Ca eil ddei azo ca a leir? Mersi nei neixvi lei yar ddei ddar no.”

5

Yisu Neir Xiex Dae Ca Ddei Leil Ggukor Gger

¹ Giedae yaa neixvi halbbor hal bbu leil Gelase mermi^m lei ci a. ² Yel Yisu cuaxr leil zei lei a qie neir xiex dae ca ar ddei a, lixrbbax cili gga

^m5:1 *Gelase mermi* Arbosobo Ddei Sul cirberber leil a Gelase mermi ddei leil Jiadaxlla mermi lei bbeix.

ddux lei a, yar dax lei a. ³ Ca eil ddei mel zoxlzoxl a lixrbbaex cili gga hher dae, arseir lei yar leil neixl gex ver nr xie, hexsox sser a lei yar leil neixl gex ver nr ddo. ⁴ Ca mel hexsox sser a yar qihher leixrhher leil lei hormo boxl nei neixl gex du lei goxr a. Nael yar halae zex te gger a; qihher leil neixl gex dae ddei lei yar deil me gger a, yel arseir lei yar leil neixl gex ssei nr xie. ⁵ Merxixl-merni yar zoxlzoxl a lixrbbaex cili gga nei wordabbor worcixl-worni ae dae, yar halae legelbbe vei a, armael leil deil.

⁶ Yar vimirmir ggie Yisu leil mia a dder beix gel lei a, Yisu leil oldde textl, ⁷ worcixl-worni ae dae a bbeix: “Mu zzir ggie hher dae Arbosobo ddei Ssor, Yisu, ngo ni dax azo guaxrzoxr? Ngo Arbosobo leil dor dae a ni leil qiuxr, ngo leil tor goxr nr sol lol!” ⁸ Neir hal te eine bbeix a mel Yisu yar leil bbeix: “Ni ca eil ddei ggecir gga ddux lei!” eine bbeix goxr a nga arddeir a.

⁹ Yisu yar leil biex a bbeix: “Ni leil arsae mi?”

Yar ddarkoxl a bbeix: “Ngua mel cirke a, yel ngo leil cir cir mi.” ¹⁰ Neir hal te Yisu leil yaa leil halmaex tor ggaxr teixl gger qiuxr doxr.

¹¹ Jiajia halmaex gga worga leil mel veixr seirseil ar cir loxl dae. ¹² Yel neir te dder Yisu leil qiuxr a bbeix: “Ngua leil veixr cili gga ssi lol a, yaa ggecir leil xiex ssi lol la,” eine bbeix. ¹³ Yisu dder yaa leil ddarkoxl a. Yel neir zzu dder ddux lei a veixr cili gga ddir a, veixr cir dder lagaxlddur gga beix ze i si a, neixvi gga de ji dae a, niul zil a. Veixr maelmaerjia a mel nrdu sael zza.

¹⁴ Veixrloxlsu mel dder pa xixl a zzi gga ca nei zzi maelleil kax gga ca mel leil bbeix gger jjixr. Yel ca mel lei ddux lei a, arsae nga a bbe i lei.

¹⁵ Nael yaa Yisu dax lei ci a, neir cir cir xiex goxr ca hal ddei mel nixmox zzar lei holcir du lei a, pia veixr dae a halmaex cux dae mia a, yaa dder gexr zildu a. ¹⁶ Eil mel leil mia su ca mel yoxl, neir xiex dae ca hal ddei

pex dae mel nei veixr hal cir a arsaer lerler nga ca mel leil biar gger.

¹⁷ Yel ca mel dder Yisu leil yaa mermi gga tor nr hher eine qiuxr.

¹⁸ Yisu cuaxr leil ddeix car, neir xiex goxr ca hal ddei Yisu leil qiuxr a yar leil Yisu dax mae dae lol la eine bbeix. ¹⁹ Nael Yisu yar leil ddar-nr-koxl, yar leil bbeix: “Ni ake jjixr a, Seirpor ni leil arsaer zoxlnixr nei Seirpor ni leil azo lerler miar vaervaer bei gger, eil mel maelmaerjjia ni ddei cirssor mel leil biar gger jjixr.” ²⁰ Yel ca hal ddei dder jjixr a, Dirjiabolixl mermi su ca mel leil, Yisu yar leil azo lerler miar vaervaer bei gger a biar gger, ca mel xiar lei xiar nr ci yarzi murgur.

Yisu Ssormaer Nrnal Leil Ggukor Gger

²¹ Yisu yoxl cuaxr cux dae a, neixvi halbbor hal bbu leil ssi ci a, yel ca seirseil ar ke a mel yar dax pex mal lei. Yar neixvi qier leil hher dae car, ²² Yoxrtaexl su Arbosobo ddei sulzzaggie guaxr su Yallur mi ca ar ddei a mel Yisu leil i lei. Yar Yisu qihher ddei dax puxr gex dae a, ²³ zabbar seirseil a yar leil qiuxr a bbeix: “Ngo ssormaer ddox mel si niazzer dae a. Ni leil qiuxr, ni ngo ake ssi. Ni leixrhher ddei yar ggecir ddei leil ta gex dae a, yar leil kor lol. Eine nga a mel yar dder gol dae var a.” ²⁴ Yel Yisu dder yar dax cirgo a ssi a.

Ca seirseil ar ke a mel yar dax mae dae a, Yisu leil lei bbex dae. ²⁵ Ca cili gga mel ssormaer eine ar ddei zza. Yar mel cirni-cirni lei ggecirzza sael a sirnilni ddux doxr, cirleixr lei ddux nor nr seix ceinir koxl nga ho a. ²⁶ Yar naxcirjiuxr hormo dax lei i goxr a; zzirbae lei sser jjia a; nael halae i nr kor, ho bei ho no lir a. ²⁷⁻²⁸ Yar Yisu bei dae cirza-hanga mel leil bbejjiur a dder nixmox zzar: “Ngo Yisu ddei pia xiux leil arleixr ta a qie dder kor gaxzi var.” Eine xiar ji dae a, yar dder giedae piar a gga lei a, ca mel dax ca dae a, Yisu ddei pia xiux leil ta a. ²⁹ Halcar malmal yar sirnilni ddei ddux nor a, yel ggecir leil no ddei kor ho a yar saexl a.

³⁰ Halcar Yisu lei nixmox zzar zzir dae a, yar ddoddomo bei bbesur mel

ggecir leil ddux a. Yel dder ca mel dax za xixl lei a bbeix: “Arseir ngo pia xiux leil ta a?”

³¹ Yar dax mae dae ca mel yar leil bbeix: “Ni i lar, ca maelmaerjia lei ni leil bbex dae nor, ni halae arseir ni leil ta a biex leir?”

³² Nael Yisu zaza-lili ca mel leil i dae a, arseir yar leil ta a saexl niazzir.

³³ Ssormaer hal ddei mel yar ggecir ddei leil no ddei arsaenga a kor ho a saexl a, gexrgexr-zizimo Yisu xilmeir puxr gex dae a, yar arsaenga a yar leil ta bbeix gger a. ³⁴ Yel Yisu yar leil bbeix: “Allor, ni ngo leil ddarzzi a, ni ddei no ddei dder kor a; ni zzasoso a ake jjixr ddo a! Ni ddei no ddei kor gaxzi a.”

³⁵ Yaa halae ddar biar dae seir car, ca ar ddei a Yoxrtaexl su Arbosobo ddei sulzzaggie guaxr su ca hal ddei ake gga ddux lei a yar leil bbeix gger a bbeix: “Ni ssormaer ddox si ho a. Sulmulsu leil maxrfaxr nr ssa a.”

³⁶ Yisu bbejjiur a dder yar leil bbeix: “Gexr nr ssa, ni ngo leil ddarzzi dder ddo a!”

³⁷ Yel yar dder Birdaexr, Yargel nei yar ddei nimar Yuehal yaa leil hier dae a yar dax cirgo a ssi lol, kebal ca mel leil ssi nr dax lol. ³⁸ Yaa ca hal hhexr ake ssi ci a, Yisu mel ca mel bbixbbix-bbaxbbax me dae nei worcixl-worni aenge dae mia a. ³⁹ Yel dder nalzzar ddir a yaa leil bbeix: “Nia arsaenga a bbixbbix-bbaxbbax mo, worcixl-worni aenge dae? Aniuux ddox mel nr si mar. Yar yixrmeixljjiu dae lalnga.” ⁴⁰ Yel ca mel Yisu leil vae.

Yar dder yaa leil ggaxr teixl gger a, aniuux ddox yarbbor yarma nei yar dax mae dae ca mel leil hier dae a aniuux ddox yixrggie ddir a. ⁴¹ Yar aniuux ddox leixrhher ddei leil arssor arla gga gex dae a yar leil bbeix: “Daxllixldaxl gurmira!” Yilsi mel dder bbeix: “Allor, ni ha du la!” ⁴² Yel ssormaer ddox cirleixr dder ha du lei a ssi dae a. Ssormaer hal ddox mel

ceinir koxl sael loxr a. Yaa murgur zildu a. ⁴³ Nael Yisu yaa leil zabbar seilseir a eil mel kebal ca leil saexl lol nr ddo miardal, yoxl yaa leil anix ddox leil zzorlabox vei gger lol.

6

Naxrsalexl Su Ca Mel Yisu Leil Ddar-nr-zzi

¹ Yisu halmaex nr hher a, yoxl yar armael mermi jjixr ci a; yar dax mae dae ca mel lei ca dae. ² Wornol nixixl cir ni ci a, yar Yoxrtaexl su mel Arbosobo ddei sulzzaggie gga ca leil mul gger dae.

Nael ca mel yar mul gger dae mel leil bbejjiur a yarzi murgur a bbeix: “Yil! Ca eil ddei arseir dax zza si lei a leir? Arseir yar leil eine olnolddu lol a leir? Yar arsae ddoddomo bei var leir? ³ Yar doxl nr nga xi zi su ar ddei a zzarmar? Yar doxl nr nga Marlixlyal ddei ssor a zzarmar? Yar doxl nr nga Yargel, Yuexi, Yoxrdaxl nei Ximexr yaa ddei ago a zzarmar? Yar nimo mel lei niul dax eilmaex hher dax dae zzarmar?” Yel yaa dder Yisu leil i nr du, yar leil ddar-nr-zzi.

⁴ Yisu yaa leil bbeix: “Xiezi mel leil mel armael mermi su ca, nei armael cirssor, halae armael ake ca mel yar leil i zei.” ⁵ Yaa mel Yisu leil ddar-nr-zzi a, yar leixrhher ddei canosu ar mel leil ta a yaa leil kor lol. Eil mel lar bei cexr. Kebal ddoddomo hal mel bei nr cexr. ⁶ Yaa mel Yisu leil ddar-nr-zzi a, Yisu yarzi murgur. Yar dder zaza-lili kax hal mel gga ca leil mul gger ssi a.

Yisu Yar Dax Mae Dae Ca Ceinirmo Leil Miardal

⁷ Yisu dder yar dax mae dae ca ceinirmo leil ae si lei a, yaa leil nnel nnel cirgo a miardal teixl, yoxl yaa leil neir ggaxr teixl xie quexrlixl gger.

⁸⁻⁹ Halae yaa leil bbeix: “Nia ssi car a zzorlabox, lixlba, qixnex lael tei,

pia lael tei eil mel vei nr ssa, maelsael gga lei zzirbae ji nr ssa, zzargger ar caex vei a dder ddo a.”¹⁰ Yoxl yaa leil bbeix: “Nia arddolmaex gga ssi ci a, ca arddol hhexr nia leil hexl yuex a mel, nia dder yaa dax hher, nia mermi halmaex nr hher zzezze hher ci.”¹¹ Arddolmaex gga ca mel nia leil nr hexl nei nia ddei ddar nr no a mel, nia dder halmaex hher nr ssa. Nia ssi car a qixnex leil niagl gex dae nilme mel to pixl a, yaa leil yaa nr seir bei mel Arbosobo yaa leil ser nia saexl lol.”

¹² Yar dax mae dae ca mel dder ssi a, ca leil Arbosobo ddei ddar biar gger a, yaa leil quex a huixrsoxr lol.¹³ Yaa yoxl neir cirke ggaxr teixl lei, canosu cirke leil ssuvi mei gger a yaa leil ggukor gger a.

Ca Leil Sexlsir Gger Su Yuehal Si A

¹⁴ Yisu ddei mi ddei mel halmaex gga biar kae jjia a. Silixl zzirmar ddei lei bbejiur a. Ca cirmelmel a bbeix: “Sexlsir gger su Yuehal si a yoxl gol du xixl lei a, yel yar ddoddomo eil mel bei bbesur zza.”

¹⁵ Nael kebal ca mel zzael bbeix: “Yar mel xiezi Yirlixlyal a.”

Yoxl ca cirmelmel a bbeix: “Yar mel xiezi mel gga ar ddei a.”

¹⁶ Silixl zzirmar zzael bbejiur a bbeix: “Yar mel ngo oldde taexl goxr Yuehal ddei a; yar yoxl gol du xixl lei a.”

¹⁷⁻¹⁸ Eine xilmeir leil Silixl zzirmar mel yar nimar Feilixl ddei maerssor Siloxrdir leil yar maerssor bei lol a. Yuehal mel yar leil bbeix: “Ni yar leil ni maerssor bei lol nr hoxr.” Yel Silixl zzirmar dder ca leil miardal a Yuehal leil ssu du lei lol a, cageggie ge ji dae a.¹⁹⁻²⁰ Siloxrdir te mel Yuehal leil vuxryixr a halae yar leil seixl niazzir; nael Silixl mel Yuehal ca seir halae Arbosobo ddei xiezi ar ddei a saexl a yar leil guaxr. Yar Yuehal biar dae mel leil noni ho a dder nixmox zzar zza-nr-so. Nael yar halae noni ggese, yel Siloxrdir dder Yuehal leil seixl nr wo a.

²¹ Eine ar ni a, Silixl zzirmar ddei mel yar leil xiu nixixl hal cir ni goxr, yel vaervaerpor nei meixr cirdu guaxr su vaervaerpor, halae Jialixllixl

mermi su vaervaerpor mel leil zzo qie. ²² Yaa zzor dae car, Siloxrdir ssormaer ddox mel yaa meixsaer qier leil huade tiuxl a, Silixl zzirmar nei ca maelmaerjia lei yarzi ggese.

Yel Silixl zzirmar ddei dder ssormaer ddox leil bbeix: “Ni ngo dax azo li zzorbbeixlei ngo ni leil gger nia.” ²³ Yoxl ca mel meixsaer qier leil bbeix har zaxr a bbeix: “Ni ngo dax azo li zzorbbeixlei ngo ni leil gger, hherdder bbeix ni ngo goxr ddei ar peix li zzorbbeixlei ngo ni leil gger nia.”

²⁴ Yar dder ddux a yarma leil biex ssi a bbeix: “Ngo azo li nia.”

Yarma yar leil bbeix: “Ni sexlsir gger su Yuehal ddei oldde taex li nia.”

²⁵ Yar dder nialnga zzirmar ddei dax ddir jjixr a bbeix: “Ni sexlsir gger su Yuehal ddei oldde taex paxrzi gga ji dae a ngo leil gger la.”

²⁶ Silixl dder yarzi bei sol, nael yar ca mel meixsaer qier leil bbeix har zaxr goxr a dder nr gger nr cexr a. ²⁷ Yel dder meixr ar ddei leil miardal a Yuehal ddei oldde taex taexl ssi lol. Meixr ddei dder cageggie ssi a Yuehal ddei oldde taex taexl ssi a. ²⁸ Oldde taex paxrzi gga ji dae a, vei si lei a ssormaer ddox leil gger a, yel ssormaer ddox dder yarma leil gger a. ²⁹ Giedae Yuehal dax mae dae su ca mel bbejjiur a dder, yar ggecir ddei bbax xixl si a lixrbbaex gga giexlhex a.

Yisu Ca Ngordu Leil Zzor Bbox Lol

³⁰ Yisu miardal dae ca mel yar dax lei, yel yaa bei dae cirza-hanga mel nei Arbosobo ddei ddar mel ca leil arsae lerler biar gger Yisu leil bbeix gger. ³¹ Halmaex gga yaa dax lei su ca mel yarzisael miur a, yel yaa mel almeixr lei zzor nr mael a. Yisu yaa leil bbeix: “Nia ngo dax cirgo a mipaerbbae gga ssi a, arleixr wornol ssi.”

³² Yaa dder cuaxr cux dae a, yaa ddei yaa mipaerbbae gga ssi a. ³³ Nael ca mel yaa ssi du si ggie mia a, halae yaa leil i teixl lei a. Yel zzi cirddeir-hanga gga ca mel yaa dax beix mal a, yaa xilmeir leil beix ci a.

³⁴ Yisu cuaxr jiaxl gga ddux lei a, ca seirseil ar ke mia. Yaa mel acixl ya mel yaloxlmo nr zza sael a nga, yel Yisu dder yaa leil zoxlnixr a yaa leil Arbosobo ddei ddar mul gger.

³⁵ Mercixl jiur a, yar dax mae dae ca mel yar dax lei a bbeix: “Eilmaex mel mipaerbbae a nga, lae lei lae dae ho a. ³⁶ Ca mel leil ssi lol a, yaa leil zaza-lili kax mel gga armael ddei armael zzorddu vae lel ssi lol hor.”

³⁷ Nael Yisu yaa leil bbeix: “Nia yaa leil zzorlabox gger ssi!”

Yar dax mae dae ca mel dder bbeix: “Ngua piu nrxiu pirⁿ meirne aba vae a yaa leil zzor lol a ngo?”

³⁸ Yisu yaa leil bbeix: “Nia aba hormo zza seir arleixr i ssi.”

Yaa i ho a dder bbeix: “Aba ngor pir nei ngol nnel zza.”

³⁹ Yisu dder yaa leil miardal a ca mel leil circir-circir silbbarbbae leil cux dae lol. ⁴⁰ Ca mel dder cux dae a. Cirxiu ler circir cux dae lei zza, ngorceimo circir cux dae lei zza. ⁴¹ Yisu dder aba ngo pir nei ngol nnel vei dae a merlabbor i dae a Arbosobo leil nawo, yel aba ngaxl kae a yar dax mae dae ca mel leil zzi gger, yel yaa dder ca mel leil bbe gger, ngol nnel lei ca mel leil bbe gger a. ⁴² Yaa maelmaerjjia lei zzor a, halae zzor bbox a. ⁴³ Yar dax mae dae ca mel dder aba zzor nirzzei nei ngol zzor nirzzei mel se xixl lei a; bellerzzi ceinir taex gga ji bbi a. ⁴⁴ Aba zzor su mel capor lar nga lei ngordu sael zza.

Yisu Neixvi Teixlleil Ssi Dae

⁴⁵ Eine goxr ho a, Yisu dder nialngasael yar dax mae dae ca mel leil zul a, cuaxr cux dae a, Boxrsaexldaxl zzi ssor dax hal bbu leil gger zaxr lol. Yar nael ca mel leil jjixr lol. ⁴⁶ Ca mel ssi ho a, yar dder wordabbor ddeix a, Arbosobo dax ddar biar ssi a.

^{n6:37} *piu nrxiu pir* Piu nrxiu pir hherdder ca cir ddei heixl xiubbo sael sulku wo ddo zzirbae nga a.

⁴⁷ Giedae eilmerxixl ci a, cuaxr jiaxl mel neixvi agala gga ssi ci ho a. Yisu nael halae cirmuzil a hieltebbor hher dae seir. ⁴⁸ Mersi ddei si piar pox a, yar dax mae dae ca mel cuaxr huaxr a yarzi huaxr le yar mia a. Merxixl-soxiu sael ci a, yar dder neixvi teixlleil ssi dae a, yaa dax halmaex ssi gel a, yaa leil ssi leixl gger niazzir. ⁴⁹ Nael yar dax mae dae ca mel yar neixvi teixlleil ssi ggie mia a qie, caxiu mia a zzir dae a dder ae du lei a. ⁵⁰ Yaa maelmaerjia lei yar leil mia a nixmox zzar lei ssurssulssur gexr zildu a.

Yisu dder jiuurjiu-maemae yaa leil bbeix: “Nia nixmox vaervaer arla bei dae lalssa. Ngo a nga. Nia gexr nr ssa!” eine bbeix a. ⁵¹ Yel yar dder yaa dax cuaxr leil ddeix a, mersi ddei dder jia nor a. Nael yar dax mae dae ca mel nixmox zzar yarzi murgur. ⁵² Yaa mel nixmox gex a Yisu arsaenga a ca eine ar ke leil aba bbe zol bbox xie yaa nr saexl. Yel yaa dder murgur.

Gexrnixrsalexl Zzi Gga No Su Ca Mel Leil Ggukor Gger

⁵³ Yaa neixvi leil gger ho a, Gexrnixrsalexl mermi lei ci a, cuaxr jiaxl dder yarqierbbaer nor dae a. ⁵⁴ Yel yaa cuaxr leil zei lei a qie ca mel Yisu leil i teixl lei a. ⁵⁵ Yel dder mermi hal ddei gga beix jiax a, Yisu lei a ca mel leil bbeix gger. Ca mel Yisu arddolmaex hher dae bbejjiur a dder, goxrzeix sser a canosu mel leil yar dax bil mal lei. ⁵⁶ Yisu kaxmo gga ssi ci, zzi gga ssi ci, bbeixsael kaxssor gga ssi ci zzorbbeixlei, ca mel dder no su ca mel leil zzijiul gga dol dae a, Yisu ssi gel lei car no su mel dder Yisu leil qiuxr a yar ddei pia zi ddei leil arleixr ta lol. Ha ta wo su ca mel no ddei dder kor a.

7

Halcar Ca Ddei Leiddur Ddei Leil Biar

¹ Farlixsaexl su ca nei Arbosobo ddei sulsaexlsu ca nnel sael a Yiluxlsaler zzi gga cirdae a Yisu dax lei. ² Yaa mel Yisu dax mae dae ca mel leixrhher seibeix lol leiddur ddei dax nr zox dae, hherdder leixrhher nr cir almeixr zzor ggie mia a. ³ Halleix mel Farlixsaexl ca nei Yoxrtaexl su ca mel halcar ca ddei leiddur mel dax bei mae dae, yel yaa zabbar seilseir a leixrhher nr cir arddeirnga a mel dder almeixr nr zzor; ⁴ zziijul gga jjixr lei a lei, zabbar seilseir a ggecir nr cir arddeirnga a almeixr nr zzor; halae kebal leiddur lei cirke zza. Yaa mel hormo zeix nei nga a lei halae halcar ca mel ddei leiddur dax bei mae dae, bir dae a bbeix, beizi, bbie, allur nei cirza-hanga sser dae zzaegu mel arsaе cir lei bei mae dae.

⁵ Farlixsaexl su ca nei Arbosobo ddei sulsaexlsu ca mel Yisu leil bbeix: “Ni dax mae dae ca mel arsaenga a halleix niul leil guaxr su camar bbeix dae leiddur mel dax bei nr mae dae leir? Yaa arsaenga a leixrhher sei-nr-beix almeixr zzor?”

⁶ Yisu yaa leil bbeix: “Xiezi Yirsaexlyal bbeix har zaxr goxr a, nia ca seir bei laexl su mel leil bbeix dae ddar mel cirdoxr lei bbeix nr cox. Arbosobo Ddei Sul ber leil bbeix:

‘Ca eil mel meir gga bbeix dae a zzae ngo leil i du,
nixmox zzar zzae ngo leil i zei.’

⁷ Yaa mul gger dae mel ca miardal dae mel a nga,
yel yaa ngo leil zi a lei baexr a zi lalnga.”^o

⁸ Yisu yoxl bbeix: “Nia mel Arbosobo miardal dae mel dax zzae bei nr mae; ca ddei leiddur mel dax zzae bei mae dae.”

⁹ Yar yoxl zeixleixr bbeix: “Nia bei var sa bbe mar! Nia porpor ddei leiddur mel dax bei mae dae niazzir a, Arbosobo miardal dae mel bei pixl

^o7:7 Yirsaexlyal Sul 29:13 leil vaexr dae.

gger. ¹⁰ Moxrxi bbeix: ‘Ca mel arbbor ama leil i du nia, perniar nia.’^p Ha arbbor ama leil hie vuxryixr su mel leil mel dder bei zil gger nia.’^q ¹¹ Nael nia zzael bbeix: ‘Ha arseir arbbor bbeixsael ama leil bbeix: “Ngo ni leil ggerlabox mel Arbosobo leil gger ho a,” ’ bbeix arddeirnga a, ¹² yar yarbbor yarma leil per-nr-niar lei cexr. ¹³ Nia eine bei a mel nia ddei leiddur dax nael bei mae dae arnar, Arbosobo bbeix dae ddar mel nael bei pixl gger a. Nia halae kebal lei eil mel sael a eine hormo bei dae.”

¹⁴ Yisu yoxl ca mel leil ae si lei a bbeix: “Nia ngo ddei ddar noni nia, saexl nia. ¹⁵ Ha meir gga ddir mel mel ca leil sei-nr-beix nga lol nr var, nael meir gga ddux lei mel mel ca leil sei-nr-beix nga lol var. ¹⁶ [Nolba hazza dder noni dae nia.”]^s

¹⁷ Yisu ca mel dax nr hher a xi ar giex gga ddir a; yel yar dax mae dae ca mel yar leil bir dae a bbeix dae ddar eil ddei arddolyox yilsu a biex lei.

¹⁸ Yisu yaa leil bbeix: “Nia lei eil mel leil nr saexl a ngo? Holbbaexl meir gga ddir mel mel ca leil sei-nr-beix nga lol nr var nia nr saexl a ngo?

¹⁹ Meir gga ddir mel mel nixmox gga ddir ci nr nga a nei xilbe gga ddir ci a, sir teixl a zzarmar?” Yilsu mel dder bbeix cirza-hanga zzorlabox mel lei seibeix.^t

^p**7:10** *Ca mel arbbor ama leil i du nia, perniar nia* Cu'aezixr Sul 20:12 nei Semixljil Sul 5:16 leil vaexr dae.

^q**7:10** *Ha arbbor ama leil hie vuxryixr su mel leil mel dder bei zil gger nia.* Cu'aezixr Sul 21:17 nei Lixlweixljil Sul 20:9 leil vaexr dae.

^s**7:16** *Nolba hazza dder noni dae nia* Kebal Arbosobo Ddei Sul cirberber leil ddar eil qier nr zza.

^t**7:19** Moxrxi mel Lixlweixljil Sul 11 gga zzorlabox arddol mel seibeix arddol mel sei-nr-beix mul gger. Yel Yirsaexllixl su maelmaerjjia zabbar seilseir a leiddur eil mel dax bei mae dae. Nael Yisu yaa leil mul gger a bbeix zzorlabox maelmaerjjia lei seibeix.

²⁰ “Nael meir gga ddux lei mel mel nixmox gga ddux lei, eil mel larnei ca leil sei-nr-beix nga lol var. ²¹ Nixmox zzar ddux lei mel dder capor ssormaer nrbba nrbba bei, zzaegu ker, ca seixl, ²² halae kerjiar, meixneixl, nixmox neix, ca leil fur, buxlguaxr-laxlsixr bei, ca leil nixnox, bbeix vuxryixr, col, yarzi xiar nr saexl, yarzi gexrddo xiar dae eil mel nga a. ²³ Nr seir eil zzu maelmaerjjia lei dder nixmox zzar ddux lei, halae ca leil sei-nr-beix nga lol var.”

Ssormaer Ar Ddei A Yisu Leil Yarzisael Ddarzzi

²⁴ Yisu yoxl halmaex nr hher a, Tuiloxr mermi lei ci a. Yar ca ar hhexr ake ddir a kebal ca mel leil saexl lol nia-nr-zzir, nael kerzi ssei nr ddo.

²⁵ Ssormaer ar ddei zza. Yar ssormaer ddox leil mel neir xiex a; yel yar Yisu bei dae cirza-hanga mel bbejjiur a qie, Yisu dax lei a yar qihher ddei dax pur gex dae a. ²⁶ Ssormaer eil ddei mel Yoxrtaexl su nr nga, Xilaxl su ca a. Yar Xuexllixlyal-Feinixrzi mermi goxr dae. Yar Yisu leil qiuxr a yar ssormaer leil xiex dae neir te ggaxr teixl gger lol.

²⁷ Nael Yisu yar leil bbeix: “Armael ddei aniux mel leil xilmeir zzor bbox lol nia. Aniux zzorddu mel anol leil piar zol a mel nr seir.”^u ²⁸ Ssormaer ddei ddarkoxl a bbeix: “Seirpor, nga a. Nael anol mel lei aniux mel zaezir woxrke zzor pixl dae milmil-meme mel zzor.”

²⁹ Yisu yar leil bbeix: “Ni ddar bbeix dae qier leil zox dae a, ni jjixr ddo a! Neir te ni ssormaer ggecir leil nr hher dae ho a.”

³⁰ Yel yar dder jjixr a, yar ssormaer ddox yixrgguci leil yixr dae a, neir te yar leil nr xiex dae ho a mia a.

Nolbbar Dae Ca Ar Ddei Leil Ggukor Gger

^u**7:27** *Armael ddei aniux mel leil xilmeir zzor bbox lol nia. Aniux zzorddu mel anol leil piar zol a mel nr seir* Aniux mel dder Yoxrtaexl su ca mel leil bbeix.

³¹ Yisu yoxl Tuiloxr zzi dax naer ggie nr hher a Siduixl zzi gga ssi gel a, Jialixllixl mermi neixvi qier leil Dirjiabolixl mermi ssi ci a. ³² Ca mel dder nolbbar halae lodael dae ca ar ddei leil hier dae a, Yisu dax hier mal lei a, Yisu leil qiuxr a yar ggecir leil ta lol.

³³ Yisu dder yar leil hier dae a ca mel dax nr hher ar piar hier mal a, leixrni sser a yar nolba su leil giexl gger, yoxl zixlvixr sser a yar lo ddei leil mei gger, ³⁴ yel merlabbor i dae a seixl arsae sisi ar qier ho a yar leil bbeix: “Ngaxl pu ddo a,” eine bbeix a. ³⁵ Yel yar dder nol-nr-bbar a; bbejjiur xie a; lo nr dae a; ddar te var a.

³⁶ Yisu yaa leil miardal a eil mel ca leil bbeix gger nr ddo, nael Yisu yaa leil miardal a gielgiel yaa biar kae gger a. ³⁷ Ca mel lei yarzi sael murgur a bbeix: “Ca eil ddei bei dae mel cirza-hanga lei yarzi seir. Yar nolbbar dae ca mel leil bbejjiur xie lol, ddar te nr var ca mel leil lei te var lol a bbe.”

8

Yisu Ca Lidu Leil Zzor Bbox Lol

¹ Halcar a ca seirseil ar ke a mel Yisu dax hher dae, nael azo zzorlabox lei nr zza a. Yel Yisu dder yar dax mae dae ca mel leil ae si lei a bbeix:

² “Ca eil mel mel ngo dax cirgo a so ni hher ho a; nael azo zzorlabox lei nr zza a, yel ngo yaa leil zoxlnixr. ³ Yaa cirmelmel a vimir ggie lei, ngo yaa leil zzo meixr dae a jjixr lol arddeirnga a mel, yaa jjiumo ssi a ssi wor-nr-ni a.”

⁴ Nael yar dax mae dae ca mel ddarkoxl a bbeix: “Eilmaex mel mipaerbbae a nga, arddol ca einezeixl ar ke zzor bbox meirne aba zza bbeixleir?”

⁵ Yisu yaa leil biex a bbeix: “Nia aba hormo zza seir?”

Yaa ddarkoxl a bbeix: “Sir pir.”

⁶ Yisu dder ca mel leil miardal a middur ddei leil cux dae lol a, yel yar aba sir pir vei dae a Arbosobo leil nawo ho a ngaxl kae a, yar dax mae dae ca mel leil zzi gger a ca mel xilmeir dol gger lol, yar dax mae dae ca mel dder dol gger a. ⁷ Yaa halae ngolssor nnel sael zza, Yisu yoxl vei dae a Arbosobo leil nawo ho a yar dax mae dae ca mel leil miardal a ca mel xilmeir dol gger lol. ⁸ Ca maelmaerjjia lei zzor a, halae zzor bbox a; yaa zzor nirzzei dae mel se xixl lei a, bellerzzi sir taex gga se ji bbi a. ⁹ Zzor su ca mel lidu sael zza. Yel Yisu yaa leil ssi lol a. ¹⁰ Yar nael yar dax mae dae ca mel dax cirgo a cuaxr leil ddeix a Daxlmarnurta mermi ssi ci a.

Farlixsaexl Su Ca Mel Yisu Dax Ddoddomo Hal Mel Qiuxr

¹¹ Farlixsaexl ca mel Yisu dax lei a yar dax zex. Yaa yar leil sixr i niazzi a, yar leil bbeix: “Ni Arbosobo lar bei var ddoddomo ar ddei bei a ngua leil i lol la,” eine bbeix. ¹² Yisu dder bbeix: “Ael-aer! Nia eilleix ca eil coxr arsaenga a ddoddomo bei ggie i niazzi? Nael ngo nia leil yarzi bbeix gger: eilleix ca eil coxr leil mel ddoddomo i lol ddu nr zza.” ¹³ Yel yar dder yaa dax nr hher, cuaxr leil ddeix a neixvi halbbor hal bbu leil gger a.

Farlixsaexl Su Ca Mel Ddei Miljiazi Nei Silixl Ddei Miljiazi Mel Leil Fadae Nia

¹⁴ Nael Yisu dax mae dae ca mel aba vei hol-nr-cir a, yaa cuaxr jiaxl leil mel aba cir pir lar zza, kebal azo zzorlabox lei nr zza. ¹⁵ Yisu yaa leil bbeix: “Nia Farlixsaexl su ca ddei miljiazi nei Silixl zzirmar ddei miljiazi mel leil fadae nia.”

¹⁶ Yaa dder zzicarzzi dax biar a bbeix: “Giel arsaе niul aba vei hol-nr-cir a, yar niul leil eine bbeix arddeir a zzar?”

¹⁷ Yisu yaa azo biar dae saexl a dder bbeix: “Nia aba vei hol-nr-cir

lalnga mel zzi dax azo biar ddu zza? Nia halae nr saexl a ngo? Nia nixmox arsae eine gex leir? ¹⁸ Nia meixddur niar dae lei mia nr xie a ngo? Nolba niar dae lei bbejjiur nr xie a ngo? Nia hol-nr-cir a ngo? ¹⁹ Ngo aba ngor pir ngaxl kae a ca ngordu leil zzor bbox lol a, nia nirzzei dae mel se xixl lei a bellerzzi hormo taex gga se ji bbi a?”

Yaa ddarkoxl a bbeix: “Ceinir taex.”

²⁰ “Ngo yoxl aba sir pir ngaxl kae a ca lidu leil zzor bbox lol a, nael nia yoxl nirzzei dae mel bellerzzi hormo taex gga se ji bbi a?”

Yaa ddarkoxl a bbeix: “Sir taex.”

²¹ Yisu bbeix: “Nia arsae halae ngo zzorlabox mel leil biar dae nr nga nr saexl leir?”

Boxrsaexldaxl Su Mia Nr Xie Ca Ar Ddei Leil Ggukor Gger

²² Yaa Boxrsaexldaxl zzi gga lei ci a, ca mel mia nr xie ca ar ddei hier dae a, Yisu dax lei a Yisu leil qiuxr a ca hal ddei leil ta lol. ²³ Yisu dder mia nr xie ca hal ddei leixrhher ddei leil gga dae a kax mael leil hier mal a. Yel yar meixddur ddei leil zixlvixr mei gger, yar ggecir ddei leil ta gex dae a yar leil biex a bbeix: “Ni azo mia a?”

²⁴ Yar oldde ddei bil du lei a arleixr i a bbeix: “Ngo yilei-hhele ca ar mel mia a, yaa sixzzei sael a ssicixl-ssige ssi dae.”

²⁵ Yisu yoxl yar meixddur ddei leil mox, yel yar zabbar seilseir arleixr i a dder mia xie a; kor a; cirza-hanga lei mia xie gaxzi a. ²⁶ Yisu dder yar leil ake jjixr lol a yar leil miardal a bbeix: “Ni kax eil ddei gga lei ddir nr ddo, nialnga jjixr nia.”

Birdaexr Mel Yisu Mel Dder Zidu A Ssexl

²⁷ Yisu yar dax mae dae ca mel dax cirgo a Kaersarlixlyal-Feilixlbir zzi dax naer dae kax mel gga ssi a. Jjiumo car gga yar yar dax mae dae ca mel leil biex a bbeix: “Ca mel ngo arseir a bbeix dae?”

²⁸ Yaa ddarkoxl a bbeix: “Cirmelmel a nael bbeix sexlsir gger su Yuehal, cirmelmel a nael bbeix Yirlixlyal, yoxl cirmelmel a nael bbeix xiezi mel gga ar ddei a,” eine bbeix dae.

²⁹ Yar yoxl yaa leil biex a bbeix: “Halmel, nia bbeix ngo arseir a?”

Birdaexr ddarkoxl a bbeix: “Ni mel Zidu a.”

³⁰ Yisu dder yaa leil zabbar seilseir a miardal a bbeix, yar arseir a ca leil bbeix gger nr ddo.

Yisu Mel Yar Goxrsol-goxrnaxr Goxr Nia Biar Zaxr

³¹ Hane cirdae mel Yisu dder yar dax mae dae ca mel leil mul gger du lei a bbeix, Ca Ddei Ssor ddei mel arsaebeilei goxrsol-goxrnaxr cirke goxr nia, ca leil guaxr su camar, Arbosobo leil zi su vaervaerpor mel nei Arbosobo ddei sulsaxlsu mel yar leil ddar-nr-zzi, yoxl yar leil bei zil gger nia, nael so ni goxr ho a yar yoxl gol du xixl lei nia. ³² Yisu zzalzzar a yaa dax bbeix a, yel Birdaexr dder yar leil gga gex dae a yar leil hie du lei a.

³³ Yisu za xixl lei a yar dax mae dae ca mel leil i dae a Birdaexr leil hie a bbeix: “Sardaxl ni ssal dae! Ni mel ca xiar dae ddei dax lar bei mae, Arbosobo xiar dae ddei dax bei nr mae.”

³⁴⁻³⁵ Yisu yoxl ca mel leil nei yar dax mae dae ca mel leil ae si lei a bbeix: “Ha armael ddei olga ddei leil jiuxl niazzir su ca mel, arsaebeilei armael ddei olga ddei pixl var, nael ngo leil nei ngo ddei ddar seirseir mel leil olga pixl gger yuex su ca mel arsaebeilei olga zza var. Yel arseir ngo dax mae lei a mel dder armael ddei cirza-hanga piar pixl vixr nia, armael ddei sixrxixljiaxl ddei bber dae a eine mae lei nia. ³⁶ Ca mel mer woxrke cirza-hanga maelmaerjjia lei li wo zzorbbeixlei, olga ddei pixl ho a mel halae yar dax azo guaxrzoxr seir bbeixleir? ³⁷ Ca mel azo sser a cirse-cirsil lei si nr var olga ddei bo xixl lei cexr bbeixleir? ³⁸ Arbosobo leil ddar-nr-zzi nei zuixl yarzi neixl ca eil coxr gga, ha arseir ngo leil nei

ngo ca leil mul gger dae ddar mel leil seixldaddo zzir a mel, arddolcar a Ca Ddei Ssor ddei yarbbor dax cirgo a bbobbolbbo zza, halae seirceix-seirmaer tisir mel dax cirter a jjixr lei car a lei yar leil ssexl seixlda.”

9

¹ Yisu yoxl yaa leil bbeix: “Ngo nia leil yarzi bbeix gger, eilmaex gga ngier dae ca ar mel a, nr si seir dder Arbosobo ddoddomo ca ddei zzirmar bei lei ggie mia var.”

Yisu Cirgge-circir Lei Bbobbolbbo

² Qiuxl ni goxr ho a, Yisu mel Birdaexr, Yargel nei Yuehal, yaa leil hier dae a yaa ddei yaa worgamo leil ddeix a; Yisu leil i dae a halleix le-nr-sel; ³ yar ddei pia mel bbobbolbbo, yarzisael piu, middurbbor mae piu mel lei yar ddei pia mel sael a nr piu. ⁴ Cirleixr dder Moxrxi nei Yirlixlyal yaa rnel Yisu dax ddar biar dae a Yisu dax mae dae ca mel mia a.

⁵ Birdaexr dder Yisu leil bbeix: “Labir,^v niul eilmaex hher dae a yarzi seir! Xigex soler daxr cexr; cir ddei a nael ni leil daxr gger, cir ddei a nael Moxrxi leil daxr gger, cir ddei a nael Yirlixlyal leil daxr gger.” ⁶ Yaa mel gexr zildu a, yel Birdaexr lei arsae bbeix a sael seir nr saexl a.

⁷ Arleixr loxr a qie zico ar co lei a yaa leil jiul gex dae a, zico gga yoxl qiurte ar ddei bbeix teixl lei a bbeix: “Eil ddei mel ngo perniar dae Ssorzil-ssorya ddei nga a. Nia yar ddei ddar no nia.”

⁸ Yisu dax mae dae ca mel zaza-lili arleixr i a, saexl loci a qie kebal ca nr mia a. Yisu lar yaa dax halmaex hher dae ggie mia a.

⁹ Yaa worga leil zeijjixr lei car, Yisu yar dax mae dae ca mel leil miardal a bbeix: “Ca Ddei Ssor si a yoxl gol du xixl lei xilmeir leil mel, nia

^v9:5 *Labir* Labir ddei yilsu mel dder sulmulsu.

nia meixcir mia mel ca leil biar gger nr ddo.”¹⁰ Yar dax mae dae ca mel dder ddar eil mel nixmox zzar holcir ji dae a; nael yaa zzicarzzi dax biar a bbeix: “ ‘Si a yoxl gol du xixl lei’ bbaexl arddolyox yilsi a leir?”

¹¹ Yaa dder Yisu leil biex a bbeix: “Arsaenga a Arbosobo ddei sulsaxelsu mel xiezi Yirlixlyal hoba lei zaxr nia eine bbeix arddeir a leir?”

¹² Yisu yaa leil ddarkoxl a bbeix: “Yirlixlyal mel xilmeir lei a, cirza-hanga bei har zaxr lei nia. Nael Arbosobo Ddei Sul ber leil arsaenga a Ca Ddei Ssor ddei mel goxrsol-goxrnaxr hormo goxr nia, ca mel lei yar leil nr li eine bbeix neil?”¹³ Ngo nia leil bbeix gger Yirlixlyal mel lei ho a; nael ca mel yar leil arsae bei niazzir arsae bei a.^w Hherdder Arbosobo Ddei Sul ber leil yar leil biar dae mel sael a nga a.”

Yisu Neir Xiex Dae Aniux Ar Ddox Leil Ggukor Gger

¹⁴ Yisu kebal yar dax mae dae ca mel dax jjixr ci car, ca seirseil ar ke a yaa leil pex gex dae ggie mia a; halae Arbosobo ddei sulsaxelsu ca mel yaa dax zex doxr dae.¹⁵ Ca mel Yisu leil mia a dder yarzisael murgur a, yar dax beix mal lei a yar leil seirseir dae biex lei.

¹⁶ Yisu yaa leil biex a bbeix: “Nia yaa dax azo ar ddei zex suax leir?”

¹⁷ Ca mel gga ca ar ddei a Yisu leil ddarkoxl a bbeix: “Sulmulu, ngo ngo ddei ssor ddox leil hier si lei a ni dax lei. Yar leil mel ddar te nr var neir ar te xiex dae.¹⁸ Yar arddolmaex ssi ci lei neir te mel yar leil ggiex doxr, zoxl a yar leil zuax guirle gger, yar meir gga lei helvi ddux lei, yar ser ddei lei zilzir kexl gex dae, ggecir ddei lei ggerdodomo eine loxr. Ngo ni dax mae dae ca mel leil qie a, neir te leil ggaxr teixl gger lol goxr a;

^w**9:13** Ngo nia leil bbeix gger Yirlixlyal mel lei ho a; nael ca mel yar leil arsae bei niazzir arsae bei a. Yisu dax mae dae su mel yar sexlsir gger su Yuehal leil bbeix arddeir a saexl. Martaexl Sul 17:13 leil i.

nael yaa ggaxr teixl gger nr xie.”

¹⁹ Yisu bbeix: “Eil aer! Nia eilleix ca eil coxr mel Arbosobo leil lei ddar-nr-zzi, ngo nia dax arddolcar hher ci nia leir? Nia leil arddolcar sser ci nia leir? Anix ddox leil ngo dax eilmaex gga hier mal lei,” eine bbeix a.

²⁰ Ca hal ddei dder yar ssor ddox leil hier si lei a, neir te mel Yisu leil mia a gie, anix ddox leil yarzi larhor caerfo lol a, yar dder middur ddei leil zuaxcil-zuaxge zuax doxr dae a, meir gga lei helvi ddux lei a.

²¹ Yisu anix ddox yarbbor leil biex a bbeix: “Yar no eil ddei hormolsael argielggur no ho a?”

Yar ddarkoxl a bbeix: “Ye tor seir dder no dae a. ²² Neir te mel yar leil adoxl gga nei ajjix gga lei hormo boxl nei piar ji gger a yar leil bei zil gger niazzir. Seirpor, ni leil qiuxr, ni arsaе bei gger cexr arddeirnga a, ngua leil zoxlnixr la! Ngua leil beijjiu la!”

²³ Yisu yar leil ddarkoxl a bbeix: “Ni arsaenga a bbeix ‘cexr arddeirnga a’ eine bbeix neil? Ddarzzi su ca mel azo lei bei cexr.”

²⁴ Anix yarbbor ddei worcixl-worni ddarkoxl a bbeix: “Seirpor, ngo ddarzzi, nael ngo ddarzzi nr loxr, ni leil qiuxr ngo leil beijjiu la!”

²⁵ Yisu mel ca cirke beix mal dax lei ggie mia a dder neir hal te leil hie a bbeix: “Ddar te nr var nei nolbbar neir eil te, ngo ni leil miardal, ni yar ggecir ddei gga ddux lei, zeixleixr lei ddir jjixr nr ddo a.”

²⁶ Neir hal te dder worcixl-worni ae dae a, anix ddox leil larhorhormo ar boxl caerfo lol a dder ddux lei a. Anix ddox mel ca sima sael a loxr a, ca cirke a dder bbeix: “Yar si ho a.” ²⁷ Nael Yisu yar leixrhher ddei leil gga dae a yar dder ngier du lei a.

²⁸ Yisu xi gga ddir jjixr ho a, ca nr zza car a, yar dax mae dae ca mel yar leil biex lei a bbeix: “Ngua arsaenga a neir te leil ggaxr teixl lei nr xie?”

²⁹ Yisu yaa leil ddarkoxl a bbeix: “Nia neir eil mel leil ggaxr a mel Arbosobo dax ddar nr biar a mel dder ggaxr teixl lei nr xie.”

Yisu Yoxl Yar Goxrsol-goxrnaxr Goxr Nia Mel Leil Biar Zaxr

³⁰⁻³¹ Yaa mel halmaex nr hher a. Yaa Jialixllixl mermi ssi gel car Yisu mel yar dax mae dae ca mel leil mul gger dae, yel yaa arddolmaex hher dae kebal ca leil nr saexl lol. Yar yaa dax bbeix: “Ca Ddei Ssor ddei leil mel ca mel leixrga gga jia ji gger du a; yaa yar leil bei zil gger nia, nael si ho so ni goxr a yar yoxl gol du xixl lei nia.” ³² Yar dax mae dae ca mel ddar eil mel arddolyox yilsi a nr saexl, nael yar leil zzael biex nr bel.

Arseir Vaer Zzir A Biar

³³ Yaa Jiabaernoxxr kax gga lei ci ho a, Yisu xi gga hher dae a yar dax mae dae ca mel leil biex a bbeix: “Nia jjiimo car gga azo ar ddei biar suax leir?” ³⁴ Yar dax mae dae ca mel jjiimo car gga ssi dae car, yaa zzicarzzi dax arseir vaer zzir zex doxr, yel yaa yar leil ddar-nr-koxl.

³⁵ Yisu cux dae ho a, yar dax mae dae ca ceinirmo leil ae si lei a bbeix: “Ha arseir vaer zzir ddei bei niazzir arddeirnga a mel, yar mel dder ye zzir ddei bei nia, yar ca mel leil visser nia.”

³⁶ Yel yar dder aniuwxssor ar ddox hier si lei a, yaa agala gga ngier dae lol, yoxl yar leil deix du lei a yaa leil bbeix: ³⁷ “Ha arseir ngo leil weix a, aniuwx eil ddox sael a ar ddox leil hexl a mel, hherdder ngo leil hexl a; ha ngo leil hexl a mel ngo leil lar hexl nr nga a nei, ngo leil miardal si lei hal ddei leil lei hexl a.”

Yisu Leil Dir Bbeixsael Yar Leil Beijjiu

³⁸ Yuehal Yisu leil bbeix: “Sulmulso, ngua ca ar ddei mia a. Yar ni ddei mi koxl dae a neir ggaxr, nael yar ngua dax cir piar a nr bei, yel ngua dder yar leil nr ggaxr lol.”

³⁹ Yisu bbeix: “Nia yar leil tor bbiur nr gex dae. Arseir ngo ddei mi ddei

sser a ddoddomo bei, yoxl ngo leil bbeix vuxryixr eine bei nr var. ⁴⁰ Niul leil nr dir su ca mel, hherdder niul leil beijjiu su ca mel nga a. ⁴¹ Ha arseir nia Zidu dax bei mae dae saexl a, nia leil ajjix ar bei dda lol a mel, ngo nia leil yarzi bbeix gger, yar leil ggerlabox mel dder yar li wo nr ddo nga nr var.”

Ca Leil Zuixl Bei Ssi Lol Leil Biar

⁴² “Nael ha arseir ngo leil ddarzzi su ca yelye ar ddei leil zuixl bei ssi lol a, ca hal ddei leil leihher ddei leil nger ar ddei toxl gex gger a, neixvi neixlneixl gga piar zei gger lalssa. Eine nga a mel bir yar ngo leil ddarzzi su ca yelye ddei leil zuixl bei ssi lol leil seir. ⁴³ Ni ddei leixrhher ar bbor a ni leil zuixl bei ssi lol arddeirnga a mel dder taexl teixl gger lalssa, ⁴⁴ ni leixrhher ar bbor nganiul a, cirse-cirsil lei olga zza a mel bir leixrhher nr bbor jjia niar dae a, adoxl bbiu zil nixixl nr zza ggie ssi leil seir leixl. ⁴⁵ Ni ddei qihher ar bbor a ni leil zuixl bei ssi lol arddeirnga a mel dder taexl teixl gger lalssa. ⁴⁶ Ni qihher ar bbor nganiul a, cirse-cirsil lei olga zza a mel, bir qihher nr bbor jjia niar dae a dixlyuxl gga piar ji gger leil seir leixl. ⁴⁷ Ni ddei meixddur ar bbor a ni leil zuixl bei ssi lol arddeirnga a mel dder giexl teixl gger lalssa. Ni leixrhher ar bbor nganiul dae, ni qihher ar bbor nganiul dae, bbeixsael ni meixddur ar bbor nganiul dae a, Arbosobo ddei goxr gga ddir wo a mel bir leixrhher nr bbor niar dae, qihher nr bbor niar dae, bbeixsael meixddur nr bbor niar dae a dixlyuxl gga piar ji gger leil seir leixl. ⁴⁸ Halmaex gga mel,

bberzzi mel lei si nixixl nr zza,
adoxl mel lei bbiu zil nixixl nr zza.

⁴⁹ Ca cirddeir-hanga leil sixr i a, ho bei ho seir lol nia hherdder piu sae mel adoxl cu goxr sael a nga; Arbosobo leil zilabox mel leil cor aex gger

sael a nga.

⁵⁰Cor mel mel seir ar mel a; nael nr kar arddeirnga a mel, halae azo bei, arsae kar lol cexr seir bbeixleir? Nia nixmox zzar seir nia, cor sael a nga nia, zzi dax toltor a bei nia.”

10

Maerssor Leil Nr Li Bei Ddo Ddo Biar

¹Yisu yoxl halmaex nr hher. Yuedaxl lazzarmo hal bbu leil ssi gel a Yoxrtaexl mermi ssi ci a. Ca mel yoxl yar dax pex mal lei a yar dder zoxlzoxl sael a yaa leil mul gger.

²Farlixlsaexl ca mel Yisu leil sixr i niazzir a dder yar leil biex lei a bbeix: “Capor mel maerssor leil nr li bei ddo ddo?”

³Yisu yaa leil ddarkoxl a bbeix: “Moxrxi nia leil arsae miardal dae?”

⁴Yaa bbeix: “Moxrxi ngua leil miardal a bbeix, maerssor ddei leil nr li sul ar zul vaexr gger a mel dder yar leil nr li bei ddo.”

⁵Yisu bbeix: “Nia nixmox taex gex a, Moxrxi dder nia leil leiddur eil ddei vaexr gger arddeir a; ⁶nael Arbosobo cirza-hanga bei halleix mel capor ssormaer lei bei a. ⁷Yel ca mel arbbor ama dax bbe kae a, armael maerssor dax cirgo a hher nia. ⁸Eine nga a mel, capor maerssor mel ca nnel a bbeixarnar, cir ddei sael a loxr ho a. ⁹Yel Arbosobo daxrhoxr gger dae mel, ca mel bbe kae gger nr ddo.”

¹⁰Giedae yaa xi gga hher dae a, Yisu dax mae dae ca mel yar leil eil mel azo yilsi a biex. ¹¹Yar dder yaa leil bbeix gger a bbeix: “Capor ddei maerssor leil nr li a, kebal bbeix box a mel dder kerjjar a; yar maerssor ddei leil bei no a. ¹²Maerssor ddei capor leil nr li a, kebal ssi box a lei dder kerjjar a.”

Yisu Aniuessor Mel Leil Seir Lol

¹³Ca ar mel a, aniux hier dae a Yisu dax lei a, Yisu leil qie a yaa aniux mel leil ta lol a, yar dax mae dae ca mel dder ca hal mel leil hie. ¹⁴Yisu mia a dder sirzzizzimo yar dax mae dae ca mel leil bbeix: “Arbosobo ddei goxr gga ca mel dder aniux eil mel sael a nga, yel aniux mel leil ngo dax lei lol, yaa leil tor bbiur gex dae. ¹⁵Ngo nia leil yarzi bbeix gger: ha Arbosobo ddei goxr gga ddir niazzir su ca mel, aniux eil mel sael a nr nga arddeirnga a mel dder ddir nr cexr.” ¹⁶Yel yar dder aniux mel leil deix dae a, yaa leil ta gex dae a Arbosobo dax ddar biar gger a yaa leil seir lol.

Zzirbae Be Su Ca Mel Merhhexr Ddei Goxr Gga Ddir A Ddir Sol

¹⁷Yisu jjiimo car gga ssi dae car, ca ar ddei a yar dax beix mal lei a, yel yar xilmeir cizixl gger dae a bbeix: “Sulmulu, ni yarzi seir. Ngo arsaе seirseir bei a saelnei cirse-cirsil olga zza var?”

¹⁸Yisu yar leil ddarkoxl a bbeix: “Ni arsaenga a ngo leil ca seir bbeix? Arbosobo larnei seir. ¹⁹Moxrxi vaexr dae Lixlfaxr leil vaexr dae mel ni lei saexl: ca seixl nr ddo, kerjiar nr ddo, zzaegu ker nr ddo, caserggie ddarjiar te nr ddo, ca leil fur lel nr ddo, halae niabbor niama leil i du nia.”

²⁰Yar Yisu leil ddarkoxl a bbeix: “Sulmulu, eil mel maelmaerjjia ngo adallal tor seir dder bei mae dae ho a.”

²¹Yisu yar leil i dae a nixmox zzar yar leil perniar, yel dder yar leil bbeix: “Ni halae bei nr loxr ar jji zza seir, hherdder ni ddei cirza-hanga vur pixl a, zzirbae mel casolssor leil bbe gger. Eine nga a mel, ni ddei cirza-hanga seirseir mel dder merhhexr dax zza dae. Yel ni ngo dax mae lei nia.”

²²Nael ca hal ddei mel yarzi be ar ddei a; yel yar ddar eil mel noni ho a dder, yarzisaе gge-nr-se bei dae a ssi du si a.

²³Yisu zaza-lili arleixr i a, yar dax mae dae ca mel leil bbeix: “Be su ca

mel Arbosobo ddei goxr gga ddir a mel, einezeixl ddir sol naer!”

²⁴Yar dax mae dae ca mel yar bbeix dae ddar mel leil yarzi murgur, yar yoxl yar dax mae dae ca mel leil bbeix: “Albor, ca mel Arbosobo ddei goxr gga ddir a mel einezeixl ddir sol naer! ²⁵Loxltoxr hhexr nolba gga gger a lei bir be su mel Arbosobo ddei goxr gga ddir leil bei so.” ²⁶Yar dax mae dae ca mel gielgiel murgur a, yar leil biex a bbeix: “Armor! Halmel, arseir leil saelnei jiuxl wo ddo?”^x

²⁷Yisu yaa leil i dae a bbeix: “Arbosobo mel azo lei bei var, yel ca mel bei ci nr xie mel lei Arbosobo bei ci xie.”

²⁸Birdaexr Yisu leil bbeix: “Ni ardae i, ngua mel cirza-hanga lei piar dol dae a ni dax mae lei a.”

²⁹Yisu yaa leil bbeix: “Ngo nia leil yarzi bbeix gger: Ha ngo leil nei ngo ddei ddar seirseir mel leil weix a, armael ddei xi, bbeixsael arzzi-nimar, arzzi-nimo, arbor, ama, armael ddei aniux nei armael ddei mi mel nr li su mel, ³⁰gol dae seir car dder xi, arzzi-nimar, arzzi-nimo, ama, aniux nei mi cirxiu peix li wo ddo, halae yoxl ngo leil weix a ca yaa leil bixr var. Zeixleixr gol du xixl lei a giel yaa cirse-cirsil olga zza. ³¹Nael eilleix ollele hher dae ca mel arddolcar a maelele hher nia, maelele hher dae ca mel nael ollele hher nia,” eine bbeix a.

Yisu So Boxl Ddei Yar Arsae Si Nia Bbeix Har Zaxr

³²Yaa jjiimo ssi a, Yiluxlsaler zzi gga ssi car, Yisu mel xilmeir bbaer ssi dae a, yar dax mae dae ca mel dder murgur, kebal yaa dax mae dae ca mel nael gexr. Yisu yoxl yar dax mae dae ca ceinirmo leil ae si lei a, hormo ardae nr goxr dder yar pex dae du hal mel yaa leil biar gger a

^x**10:26** Halcar Yoxrtaexl su ca mel zzir dae a cabesu mel Merhhexr ddei goxr gga ddir a mel bir casolssor mel leil ddir so. Yaa zzir dae a, cabesu mel lei ddir nr cexr arddeirnga a, kebal ca mel gielgiel ddir nr cexr.

bbeix: ³³ “Nia i dae ddo! Niul Yiluxlsaler zzi gga ssi a, Ca Ddei Ssor ddei leil mel Arbosobo leil zi su vaervaerpor mel nei Arbosobo ddei sulsaexlsu mel leixrga gga jia ji gger a, yel yaa yar leil si nia zuixl dixl gger nia, yoxl Yoxrtaexl su nr nga ca mel leixrga gga jia ji gger nia. ³⁴ Yaa yar leil vaessi, lorddu sser a yar leil deil nei yar qiaxrmeix ddei leil zixlvixrpir deix gger, halae yar leil bei zil gger nia, nael so ni goxr ho a, yar yoxl gol du xixl lei nia.”

Vaervaerpor Bei Niazzir A Mel Ca Leil Visser Su Bei Nia

³⁵ Xibirtaexl ddei ssor Yargel nei Yuehal yaa nrmel mel Yisu dax lei a, yar leil bbeix: “Sulmulsu, ngua ni dax arddolyox qiuxr zzorbbeixlei ngua leil gger la!”

³⁶ Yisu yaa leil bbeix: “Nia ngo nia leil azo bei gger lol?”

³⁷ Yaa bbeix: “Seirpor, ni bbobbolbbo zzirmar bei car, ngua leil ni vael piar a ar ddei, yo piar a ar ddei cux lol la!”

³⁸ Yisu yaa leil bbeix: “Nia azo qiuxr dae nia nr saexl. Ngo ddalabox mel nia dda var var?^y Ngo sexlsir mel nia sexlsir var var?”

³⁹ Yaa bbeix: “Ngua dda var.” Yisu bbeix: “Ngo ddalabox mel nia dda nia; ngo sexlsir mel nia lei sexlsir nia. ⁴⁰ Nael nia arseir ngo vael piar a bbeixsael yo piar a cux mel, ngo lo-nr-zza. Arseir leil bei har zaxr gger dae mel dder arseir leil gger.”

⁴¹ Yisu dax mae dae ca kebal hal ceimo bbejjiur a dder yaa nr hieni leil sirzzi. ⁴² Yisu dder yaa leil ae si lei a bbeix: “Nia lei saexl, Arbosobo leil nr saexl su ca mel ddei vaervaerpor mel mel ca leil guaxr meixr yarzi middarzza. ⁴³ Nael nia mel yaa sael a eine nr nga. Nia ca mel gga arseir vaer zzir ddei bei a mel, yar dder ca mel leil visser su bei nia; ⁴⁴ arseir

^y**10:38** Yisu ddei yilsi mel dder bbeix “Ngo goxr sol labox mel nia goxr sol yuex yuex?”

vaer zzir ddei bei niazzir a mel, yar dder nia ddei zebol bei nia.

⁴⁵ Hherdder Ca Ddei Ssor ddei bei dae mel sael a nga. Yar lei a mel, ca mel yar leil visser lol nr nga a nei, yar ca mel leil visser lei arddeir a. Yar yar ddei olga ddei lei nr li a, cassor-worssor leil jiuxl a.”

Mia Nr Xie Su Ca Badirmaer Leil Ggukor Gger

⁴⁶ Yaa Yilixlge zzi gga hher dae a ddux lei car a, jjiumo qier leil mia nr xie ca ar ddei cux dae, zzo meixl lel dae. Yar mel Dirmaer ddei ssor a; yar leil Badirmaer mi. ⁴⁷ Naxrsalexl su ca Yisu ssi gel lei yar bbejjiur a, yel yar dder worcixl-worni ae dae a bbeix: “Daxlweixl giedae ca, Yisu, ngo leil zoxlnixr la!”

⁴⁸ Nael ca cirke a yar leil hie a, worcixl-worni nr ae lol. Yar gielgiel worcixl-worni ae dae a bbeix: “Daxlweixl giedae ca, ngo leil arleixr zoxlnixr la bbeix naer!”

⁴⁹ Yisu dder nr ssi ngier dae a, ca mel leil bbeix: “Yar leil eilmaex ae gel la!” Ca mel dder yar leil ae a bbeix: “Zoxrzixr nr ssa, ha du la, Yisu ni leil gger lei ae dae a.” ⁵⁰ Mia nr xie ca hal ddei dder yar ddei teixlsibbor pia xiux lei nr li halmaex piar dol dae a, lixlixllix ha du lei a, Yisu dax ssi mal lei a.

⁵¹ Yisu yar leil bbeix: “Ni ngo leil ni leil azo bei gger lol niazzir?”

Yar bbeix: “Sulmulu,^z ngo mia xie niazzir.”

⁵² Yisu yar leil bbeix: “Ni jjixr ddo a! Ni ngo leil ddarzzi a, ni meixddur ddei dder kor a.” Ca hal ddei cirleixr dder mia xie a; yel yar jjiumo car gga dder Yisu dax mae a.

11

^z**10:51** *Sulmulu* Xilaxl ddar bbeix “Labonixr.” Labonixr ddei yils mel dder sulmulu.

Yisu Yiluxsaler Zzi Gga Ddir A, Ca Mel Yar Leil Zzirmar Leil Sael A Yarzi I Du

¹ Yisu nei yar dax mae dae ca mel Yiluxsaler zzi gga ssi ci niazzir dae a, yaa Saercor worga leil Boxrfaxrcixr kax nei Boxrdaxlnixr kax gga ssi ci a, Yisu dder yar dax mae dae ca nnel leil miardal a, ² yaa leil bbeix: “Nia deixrgoxr kax hal ddei gga ddir a qie dder tarlodaexssor ar ddei neixl gex dae mia ddo. Tarlodaexssor eil ddei mel zeixleixr lei ca zzaer nr goxr seir. Yel nia pe kae a, eilmaex gga si la! ³ Ca mel nia leil arsaenga a eine bei biex arddeirnga a, nia dder bbeix: ‘Seirpor yar leil sser zoxr, cirleixr dder ni leil gga xixl gger lei.’ ”

⁴ Yar dax mae dae ca mel dder ssi a. Yaa kax gga ddir a qie dder ca ar hhexr alddur ggucirmi jjiumo qier leil tarlodaexssor ar ddei neixl gex dae mia a. Yel yaa dder pe kae gger a. ⁵ Halmaex ngier dae ca ar mel a yaa leil bbeix: “Nia tarlodaexssor ddei leil pe kae gger a azo bei?” ⁶ Yaa dder Yisu yaa leil bbeix gger goxr mel sael a ddarkoxl a; ca mel dder yaa leil gga si lol a. ⁷ Yaa tarlodaexssor ddei leil Yisu dax halmaex gga mal lei ho a, armael ddei teixlsibbor pia xiux tarlodaexssor zzoxxrbbeix ddei leil nal gex gger a, yel Yisu dder zzaer deix a.

⁸ Ca cirke a nael armael ddei teixlsibbor pia xiux jjiumo zex gga kar dae, halae ca cirmelmel a nael sixpeixl ar mel taexl si lei a jjiumo zex gga kar dae. ⁹ Xilmeir ssi su nei giedae ssi su ca mel lei ae dae a bbeix:

“Hexrsaxlnaxl!^a Arbosobo leil bbeix zae gger nia!

Seirpor yar miardal si lei su hal ddei^b leil seir lol nia!

^a11:9 “Hexrsaxlnaxl!” Hexrsaxlnaxl ddei yilsi mel dder ngua leil jiuxl la.

^b11:9 *Seirpor yar miardal si lei su hal ddei* Miardal si lei su hal ddei mel dder ca leil jiuxlsu. Yar lei “Zidu” nei “Mirsaxlyal” bbeix. Yar mel dder Seirpor mi ddei leil koxl dae lei su ddei nga a.

¹⁰ Seirpor, arddolcar a lei du niul ddei porpor Daxlweixl ddei goxr ddei leil seir lol nia!

Hexrsaxlnaxl! Mu zzir ggie hher dae Arbosobo leil bbeix zae gger nia!”

¹¹ Yisu Yiluxlsaler zzi gga ssi ci a, yel yar dder Arbosobo ddei xi zzaexggu gga ddir a, zaza-lili cirza-hanga arleixr i. Neixmar niazzir dae a, yar dder yar dax mae dae ca mel leil hier dae a zzi gga ddux a, Boxrdaxlnixr kax gga ssi a.

Vuxrhuagol Zzei Leil Hie No

¹² Giedae cir ni yaa Boxrdaxlnixr kax gga ddux lei car, Yisu zzo meixr a.

¹³ Yar vimirmir ggie vuxrhuagol ar zzei mia a, vuxrhuagol zzei leil mel yar peixl niar dae, yel yar dder saer zo wo ddo zzir dae a. Nael halleix mel vuxrhuagol niar zi nr nga, yel yar sixzzei zzei woxrke lei ci a lei seixlpeixl lar niar dae, azo lei zo nr wo. ¹⁴ Yisu dder sixzzei hal zzei leil bbeix: “Eilni zzezze arseir lei ni ddei saer zzor nixixl nr zza a.” Yar ddar eil mel bbeix a mel yar dax mae dae ca mel lei bbejjiur a.

Yisu Ca Mel Leil Arbosobo Ddei Xi Gga Ggaxr Teixl Gger

¹⁵ Yaa Yiluxlsaler zzi gga lei ci a. Yisu Arbosobo ddei xi zzaexggu gga ddir a, vaexleixr bei su ca mel leil ggaxr teixl gger a; halae zzirbae bo su ca mel ddei zaezir nei dderbel vur su ca mel ddei baxrde mel bbax pox gger a; ¹⁶ halae yoxl ha zzaegu vurlabox vei dae su ca mel leil Arbosobo ddei xi zzaexggu gga ssicixl-ssige nr ssi lol. ¹⁷ Yar dder yaa leil mul gger a bbeix: “Arbosobo Ddei Sul ber leil bbeix:

‘Ngo ddei xi ddei mel,

circuxr-hanga ca mel ngo dax ddar biar ggie a zzarmar?

Nael nia zzaexpor cide ar ddei bei mal gger a.’ ”

¹⁸ Arbosobo leil zi su vaervaerpor mel nei Arbosobo ddei sulsaxlsu mel ddar eil mel leil bbejjiur a dder arsae bei a, Yisu leil bei zil gger nia xiar doxr dae a. Nael ca maelmaerjjia lei Yisu mul gger dae mel leil noni meixr a, yel Yisu leil bei zil gger niazziir su mel dder Yisu leil gexr.

¹⁹ Eilmerxixl ci a Yisu nei yar dax mae dae ca mel zzi ddei gga ddux a.

Vuxrhuagol Zzei Hie Zzu A

²⁰ Cirneixrnehe gga yaa vuxrhuagol zzei dax halmaex ssi gel car, vuxrhuagol zzei hal zzei mel yarji ta ta lei hie zzu ho a mia a. ²¹ Birdaexr dder Yisu bbeix goxr ddar mel leil holcir du lei a yar leil bbeix: “Labir, ni arleixr i, ni hie goxr vuxrhuagol eil zzei yarji ta ta lei hie zzu a bbe sor!”

²² Yisu yaa leil ddarkoxl a bbeix: “Nia Arbosobo leil ddarzzi nia. ²³ Ngo nia leil yarzi bbeix gger, arseir nixmox zzar ddarzzi gaxzi a mel worga eil ga leil bbeix: ‘Ni eilmaex gga ba pixl a neixvi gga piar ji!’ eine bbeix zzorbbeixlei, yar arsae bbeix mel dder arsae nga var. ²⁴ Yel ngo nia leil bbeix gger: nia Arbosobo dax ddar biar car, yar dax azo qiuxr zzorbbeixlei, nia li wo ddo ddarzzi a mel hherdder hal mel sael a nga var.

²⁵ Nia ngier dae a Arbosobo dax ddar biar dae car, nia ca leil yaa bei cox mel ssoxrsuxl a mel, nia ddei merhhexr gga hher dae Arbbor lei nia bei cox mel ssoxrsuxl. ²⁶ [Nia ca mel leil ssoxr-nr-suxl arddeirnga a mel, nia ddei Merhhexr Arbbor lei nia bei cox goxr mel ssoxr-nr-suxl.”]^c

Yisu Ddei Quexrlixl Mel Leil Biar

²⁷ Yaa yoxl Yiluxlsaler zzi gga jjixr ci a, Yisu Arbosobo ddei xi zzaexggu gga ssi dae car, Arbosobo leil zi su vaervaerpor mel nei Arbosobo ddei

^c**11:26** *Nia ca mel leil ssoxr-nr-suxl arddeirnga a mel, nia ddei Merhhexr Arbbor lei nia bei cox goxr mel ssoxr-nr-suxl.* Arbosobo Ddei Sul cirberber a ddar eil qier nr zza.

sulsaexlsu mel, halae ca leil guaxr su camar mel yar dax lei a. ²⁸ Yar leil biex a bbeix: “Ni azo quexrlixl koxl dae a eil zzu bei neil? Arseir ni leil einezeixl ddo lol a leir?”

²⁹ Yisu yaa leil ddarkoxl a bbeix: “Ngo xilmeir nia leil ddar ar qier biex a nia ngo leil ddarkoxl arddeirnga a, ngo dder ngo azo quexrlixl koxl dae a, eil zzu bei nia leil bbeix gger. ³⁰ Sexlsir gger su Yuehal ca leil sexlsir gger a mel Merhhexr Arbosobo leil koxl dae bbeixsael ca leil koxl dae a bei neil? Nia ngo leil ddarkoxl la!”

³¹ Yaa dder zzicarzzi dax zzubbe a bbeix: “Niul bbeix: ‘Merhhexr Arbosobo leil koxl dae’ bbeix arddeirnga a, yar dder bbeix: ‘Halmel, nia arsaenga a Yuehal leil ddar-nr-zzi?’ eine bbeix var. ³² Cassor-worssor lei Yuehal mel xiezi ar ddei a zzir dae, yel niul bbeix: ‘Yuehal ca leil koxl dae lal nga’ bbeix arddeirnga a, niul yoxl ca mel dax gexrddo.”

³³ Yel yaa dder Yisu leil ddarkoxl a bbeix: “Ngua nr saexl.” Yisu lei yaa leil bbeix: “Halmel, ngo lei arseir leil koxl dae a eil mel bei nia leil bbeix nr gger.”

12

Bir Dae A Mi Ba Su Ca Ar Mel Leil Biar

¹ Yisu mel bir dae a yaa leil biar gger a bbeix: “Ca ar ddei a mel puxрто dae ggie ar ddei zza. Yel yar puxрто dae ji ho a, zaza-lili lei weixrqiaxr weixr du lei a, nalzzar puxрто zzubbaer jjiux ggie bbeddur ar ddei giexl dol dae, puxрто su ggie xi mumumo ar giex zi dae a, si leil ba gger ho a; yar nael kebal mermi ssi a. ^{d 2} Giedae puxрто mi zi ci a, puxрто dae ggie seirpor ddei dder yar leil miar bei gger su ca ar ddei leil miardal a, puxрто dae ggie ba su ca mel dax ssi a yar li mibbe puxрто mel se ssi lol.

^d12:1 Yirsaexlyal Sul 5:1-7 leil biar dae.

³ Nael ca hal mel yar leil miar bei gger su ca ddei leil ssu gex du lei a, yar leil ar pu deil gger a, leixrhher xia dae a jjixr lol a. ⁴ Seirpor ddei yoxl ar ddei miardal a ssi lol. Nael ca hal mel yoxl yar leil miar bei gger su ca eil ddei leil oldde ddei deil no gger, halae yar leil bbeix no. ⁵ Seirpor ddei yoxl zeixleixr yar leil miar bei gger su ca ar ddei leil miardal a ssi lol, nael ca hal mel yoxl yar leil seixl zil gger. Giedae yoxl kebal yar leil miar bei gger su ca cirke miardal teixl a, nael cirmelmel leil a nael deil, cirmelmel leil a nael seixl zil gger a.

⁶ Puxrto dae ggie seirpor ddei mel miar bei gger su maelmaerjjia miardal jjia ho a, yar perniar dae ssorzil-ssorya ddei lar nga a. Yar bbeix: ‘Yaa ngo ddei ssor ddei leil i du var.’ Eine bbeix a maelele ci a dder yar ssor ddei leil miardal teixl a.

⁷ Nael puxrto dae ggie ba su ca mel, zzicarzzi dax zzibbe a bbeix: ‘Ca eil ddei mel, puxrto dae ggie seirpor ddei cirza-hanga li mibbe su ca ddei nga a. Lei, niul yar leil seixl zil gger a mel, yar ddei cirza-hanga lei niul li wo ddo a.’ ⁸ Yel yaa dder yar ssor ddei leil ssu gex du lei a, yar leil seixl zil gger a, puxrto dae ggie maelleil piar dol gger a.”

⁹ Bir dae a biar dae ddei biar jjia ho a Yisu bbeix: “Nia zzir dae a, puxrto dae ggie seirpor ddei arsae bei var neil? Yar lei a ca eil mel leil bei zil gger nia, yel puxrto dae ggie ddei kebal ca leil ba box gger.

¹⁰⁻¹¹ Arbosobo Ddei Sul ber leil vaexr dae a bbeix:

‘Sixrjiuxr xiax su ca mel piar pixl gger legelbbe hal taex mel,
xi giexrluxl gga sixrjiuxr leil zoxlyoxl zzir legelbbe taex loxr ho a.
Seirpor bei dae eil mel niul meixddurga gga i dae a yarzi murgur,’^e
eine bbeix a.

^e12:10-11 Sipi Sul 118:22-23 leil vaexr dae.

Holbbaexl nia ddar eil mel leil zza nr goxr a ngo?”

¹²Yoxrtaexl su ddei vaervaerpor mel Yisu bir dae a bbeix dae ddar eil mel yaa leil bbeix dae arddeir a i teixl lei a, yel yar leil ssu du lei niazzir, nael yaa yoxl ca mel leil gexr a, yel dder yar dax nr hher ssi du si a.

Loxrmarm Goxrjia Zzirmar Leil Suix Sax Gger Ddei Leil Biar

¹³Giedae yaa yoxl Farlixlsaexl su ca nei Silixl vaervaerpor dax mae dae ca nnel sael leil miardal a Yisu dax lei lol a, Yisu leil ddar toxl lei a, yar leil ke niazzir. ¹⁴Yaa Yisu dax lei a yar leil bbeix: “Sulmulsu, ngua saexl, ni mel ddar jiar nr bbeix lei, ca nr i. Ca mel azo xiar dae zzorbbeixlei ni halae zabbar seilseir a Arbosobo ddei ddarzi mel ca leil mul gger. Ni zzir dae a ngua Loxrmarm goxrjia ddei zzirmar^f leil suix sax gger a hoxr hoxr?

¹⁵Niul yar leil suix sax gger mibbebbe?”

Yisu mel yaa yar leil biex laexl dae lalnga i teixl lei a dder bbeix: “Nia arsaenga a ngo leil sixr i? Nia piu ar pir vei si lei a ngo leil i lol!” ¹⁶Yaa dder vei si lei a Yisu leil i lol a, Yisu yaa leil biex a bbeix: “Zzirbae taex leil niar dae oldde taex arseir ddei oldde a? Mi ddei arseir ddei mi a?”

Yaa ddarkoxl a bbeix: “Loxrmarm goxrjia zzirmar ddei a.”

¹⁷Yisu dder bbeix: “Halmel Loxrmarm goxrjia zzirmar ddei zzaegu mel yar leil gger nia, Arbosobo ddei zzaegu mel lei Arbosobo leil gger nia.” Yaa ddar eil mel noni ho a yarzi murgur a.

Si Ho A Yoxl Gol Du Xixl Lei Ddei Leil Biar

¹⁸Giedae Sardugie⁹ su ca ar mel a Yisu dax lei a. Yaa mel ca si ho a gol

^f**12:14** *Loxrmarm goxrjia ddei zzirmar* Xilaxl ddar bbeix “Kaersaxl” eine bbeix. Yilsi mel dder zzirmar.

⁹**12:18** *Sardugie* Sardugie ca mel Moxrxi ddei Lixlfaxr mel leil lar noni; xiezi ddei sul mel leil nr guaxr. Yaa Farlixlsaexl ca mel ddei leiddur mel dax bei nr mae. Yaa ca mel gol du xixl lei var ddar-nr-zzi; tisir nei neir

du xixl lei var ddar-nr-zzi. Yel yaa dder Yisu leil biex lei a bbeix:

¹⁹ “Sulmulu, Moxrxi niul leil Lixlfaxr leil vaexr deix gger dae a bbeix: Ca ar ddei a anix lei nr zza seir dder si a, yel yar maerssor lar nga arddeirnga a, yar ddei nimar mel dder yarlor leil bbeix a yaa maerssor bei lol nia, yargo leil ssormine hier gger nia,” eine bbeix a. ²⁰ Yaa yoxl bbeix: “Arzzi-nimar sir hieni zza. Vaervaer ddei mel maerssor bbeix wo a, nael yar anix lei nr zza seir dder si a. ²¹ Yar nimar leixleix ddei dder yarlor leil bbeix a; nael yar lei anix nr zza seir dder si a. Giedae nimar bbaexbbaex ddei lei yarlor leil bbeix a; nael ciryoxr a nga. ²² Yaa arzzi-nimar sir hieni jjia lei ssormaer eil ddei leil bbeix a; nael maelmaerjjia lei anix nr zza seir dder si a; maelele ci a ssormaer eil ddei lei si a. ²³ Yar mel arzzi-nimar sirler jjia leil lei fu gger goxr a. Eine nga a, yaa si a yoxl gol du xixl lei a, yar arddol ddei ddei maerssor a neil?”

²⁴ Yisu yaa leil ddarkoxl a bbeix: “Nia Arbosobo Ddei Sul ber leil noni wo nr xie, halae Arbosobo arsaesael ddo lei nia nr saexl, yel nia eine bbeix a mel nr hoxr. ²⁵ Ca mel si a yoxl gol du xixl lei car a mel, maerssor bbeix su lei nr zza a; ssormaer fu su lei nr zza a. Yaa tisir mel lesel a. ²⁶ Ca si ho a yoxl gol du xixl lei eil ddei leil biar ci a mel, Arbosobo alcur cili gga hher dae a Moxrxi leil bbeix: ‘Ngo mel Yalboxrlahar ddei Arbosobo a; Yirsar ddei Arbosobo a; Yargel ddei Arbosobo a.’ Holbbaexl nia Moxrxi vaexr dae sul eil mel leil zza nr goxr a ngo? ²⁷ Yilsu ddei mel dder bbeix: Arbosobo mel gol dae ca mel ddei Arbosobo a; ca sima mel ddei Arbosobo nr nga. Yel nia xiar dae mel cirdoxr lei nr hoxr.”

Arbosobo Miardal Dae Zoxlyoxl Zzir Tiuxr Leil Biar

²⁸ Arbosobo ddei sulsaexlsu ar ddei a halmaex hher dae. Yar yaa zzi

zza lei ddar-nr-zzi.

dax zex dae mel leil noni ho a dder Yisu yarzi ddarkoxl naxrcixl saexl a, yel yar Yisu leil biex a bbeix: “Lixlfaxr leil miardal dae mel gga arddol ddei zoxlyoxl zzir a neil?”

²⁹ Yisu ddarkoxl a bbeix: “Zoxlyoxl zzir tiuxr mel dder bbeix: ‘Yirsaexllixl su ca mel, nia noni dae nia, niul ddei Seirpor Arbosobo mel cir ddei lar zza. ³⁰ Yel ni wor maelmaerjjia ddux a Arbosobo leil perniar nia. Ni ddei nixmox cirtaex-lorbba, xiu cirddeir-lorbba, ca cirddeir-lorbba ni ddei Seirpor Arbosobo leil perniar nia.’ ³¹ Miardal dae eil ddei woxrke ddei nael hherdder bbeix: ‘Ni armael leil perniar mel sael a si leil perniar nia.’ Bir miardal dae eil nnel leil zoxlyoxl leixl nr zza a.”

³² Arbosobo ddei sulsaxlsu hal ddei Yisu leil ddarkoxl a bbeix: “Sulmulu, ni yarzi bbeix hoxr. Arbosobo mel dder cir ddei lar zza, yar leil cuxrteixl ho a mel, zeixleixr kebal Arbosobo nr zza a. ³³ Halae wor maelmaerjjia ddux a Arbosobo leil perniar nia. Ni ddei nixmox cirtaex-lorbba, ca cirddeir-lorbba seilseir a yar leil perniar nia. Ni armael leil perniar mel sael a si leil perniar nia. Eil ddei mel bir yar leil cirza-hanga zi leil lei seir a.”

³⁴ Yisu i dae a yar yarzi ddarkoxl ma, yel dder yar leil bbeix: “Ni Arbosobo ddei goxr ddei dax giex vi-nr-mir dae a.”^h Hane cirdae mel, arseir lei yar leil azo lei biex nr bel a.

Zidu Arseir Giedae Ca A Biar

³⁵ Yisu Arbosobo ddei xi zzaexggu gga ca leil mul gger dae car, yar yaa leil biex a bbeix: “Arsaenga a Arbosobo ddei sulsaxlsu ca mel, ‘Zidu mel Daxlweixl ddei ssor a’ eine bbeix? ³⁶ Arbosobo ddei Xiu ddei Daxlweixl

^h**12:34** *Ni Arbosobo ddei goxr ddei dax giex vi-nr-mir dae.* Ddar eil qier ddei yilsi mel dder ni Arbosobo ddei goxr gga ddir du a; ni Arbosobo ddei cassor-worssor loxr niazzir dae a.

leil bbeix lol a bbeix:

‘Seirpor Arbosobo ngo ddei Seirpor leil bbeix:

Ni ngo yo piar a gga cux dae a ngo leil xia dae,
yel ngo ni leil vuxryixr su ca mel leil deil leixl gger a,
ni qihher woxrke jjiux ji dae sael a nga lol hane zzezze ci.’”ⁱ

³⁷ Yisu yoxl bbeix: “Daxlweixl lei Zidu leil Seirpor ae dae mel, yar arsae Daxlweixl ddei ssor nga var bbeixleir?” Ca maelmaerjia lei yar biar dae mel leil yarzi noni meixr.

Yisu Arbosobo Ddei Salsaexlsu Mel Leil Bota

³⁸ Yisu ca mel leil mul gger dae car a, yaa leil bbeix: “Nia Arbosobo ddei salsaexlsu ca mel leil fadae nia. Yaa mel pia darsisimo naxrcixlcixlmo hal xiux veixr meixr, mimu-ddarmumo yarzi middarzza yaa zzijiul gga ssicixl-ssige ssi dae a, ca mel yaa leil zzasoso dae biex lol meixr. Halae ca mel yaa leil i du lol meixr. ³⁹ Yoxrtaexl su mel Arbosobo ddei sulzzaggie gga vaervaerpor cux ggie cux meixr, seivi mu ggie lei yaa cux seir zzir ggie cux meixr. ⁴⁰ Yaa maermocir mel ddei cirza-hanga lei giexl si, yoxl Arbosobo dax ddar seirseir arcixl biar laexl. Ca eil mel leil mel yarzi gexrddo faxr nia.”

Maermocir Ar Ddei A Arbosobo Leil Zzirbae Gger

⁴¹ Yisu Arbosobo ddei xi zzaexggu gga hher dae car a, yar qiaxrmeix ddei zzirbae dol ggie ddei dax mal dae a cux dae, yel ca mel zzirbae dol ji a arsae dol ji bbe i dae. Cabessor cirke a zzirbae yarzi miur dol ji gger a. ⁴² Yoxl maermocir yarzi sol ar ddei lei a, zzir pir nr taex dol ji gger a; hormo ardoxr nr per.

ⁱ**12:36** Sipi Sul 110:1 leil vaexr dae.

⁴³⁻⁴⁴ “Ngo nia leil yarzi bbeix gger, maermocir yarzi sol eil ddei mel yar armael lei sser loxr nr ddo, yar halae maelmaerjjia vei si lei a dol ji gger, yel yar dol ji gger dae mel bir arseir dol ji gger dae mel leil lei miur leixl, nael kebal ca mel zzirbae dol ji gger a mel, yaa sser jjia nr ddo mel vei si lei a dol ji gger arnar a.”

13

Zidu Jjixr Lei Car Arsae Lerler Nga Ddei Leil Biar

¹ Yisu Arbosobo ddei xi zzaexggu gga ddux lei car a, yar dax mae dae ca ar ddei a yar leil bbeix: “Sulmulso, ni arleixr i, Arbosobo ddei xi zzir lei yarzi zi naxrcixl, zi dae legelbbe mel lei yarzi naxrcixl.”

² Yisu yar leil bbeix: “Ni doxl nr nga Arbosobo ddei xi vaervaermo eil zzir leil mia a zzarmar? Nael ngo ni leil bbeix gger, arddolcar a maelmaerjjia lei caexr pixl jjia nia, legelbbe cirtaex-hanga lei caexr ze lei nia.”

³ Yisu Saercor worga hal ga leil cux dae car a, yar qiaxrmeix ddei Arbosobo ddei xi zzir dax mal dae a cux dae, yel Birdaexr, Yargel, Yuehal nei Adaexrlixl yaa dder yar leil biex lei a bbeix: ⁴ “Arddolcar eine nga var? Eine nga xilmeir leil arsae lerler nga var? Ngua leil bbeix gger la!”

⁵⁻⁶ Yisu yaa leil bbeix: “Hane ci a mel, ca cirke a ngo ddei mi sser dae a lei a bbeix: ‘Ngo mel Zidu ddei nga a.’ Eine bbeix a ca cirke leil fur. Yel nia fadae nia, nr nga a ca mel nia leil fur leilei. ⁷ Nia cirmaexmaex a nael zaxlddaexr dae, cirmaexmaex a nael zaxlddaexr du a eine bbejjiur a lei gexr nr ssa. Eil zzu mel arsaebeilei eine nga nia, nael nixixl maelele ddei halae goxr nr ci seir.^j ⁸ Ca mel eil cuxr a hal cuxr dax zaxlddaexr nia,

^j13:7 Arbosobo Ddei Sul ber leil bbeix arddolcar a Yisu jjixr lei nia.

goxrjia eil goxr lei hal goxr dax zaxlddaexr nia, middurbbor zzarvul-zzarmae lei mi lei nei zzorddu nr zza eine nga nia. Eil mel mel halae goxrsol-goxrnaxr goxr du lei a nga seir, hherdder ssormaer aniu xiu a no du lei hal ddei sael a nga seir.

⁹ Halcar a ca mel nia leil Yoxrtaexl su ddei vaervaerpor cir leil jia gger var, halae ca mel lorddu sser a Yoxrtaexl su mel Arbosobo ddei sulzzaggie gga nia leil deil. Nia yoxl ngo leil ddarzzi a, vaervaerpor nei zzirmar mel meixsaer qier leil ngier dae a, ngo arseir a yaa leil biar gger cexr. Nia fadae nia. ¹⁰ Nixixl maelele ddei ci du xilmeir leil mel ngo ddei ddar seirseir mel hoba middurbbor circuxr-hanga ca mel leil biar gger nia. ¹¹ Ca mel nia leil vaervaerpor mel meixsaer qier leil ssu dol gger car a mel, nia armael yaa dax ddar biar dae nr nga a nei, Arbosobo ddei Xiu ddei nia leil biar lol arddeir a. Yel nia azo ddar biar nia zoxrzixr zaxr nr ssa. Hane ci a mel, nia leil azo ddar biar lol mel nia dder azo ddar biar lalssa.

¹² Halcar a ci a mel, arzzi-nimar mel lei arzzi-nimar leil vurlel, arbbor lei ssor leil vurlel, yaa leil si zil lol niazzir; ssormine mel lei arbbor-ama leil dir, yaa leil si zil lol niazzir. ¹³ Nia mel ngo leil ddarzzi a, ca maelmaerjia lei nia leil vuxryixr, nael sser gex doxr dae su ca mel leil mel jiuxl wo a.

¹⁴ ‘Cirza-hanga lei bei xiaxr gger su yarzi vuxlsuxrddo hal te yar ngier mi-nr-bbe halmaex ngier dae^k ddar eil qier arddolyox yilsu a nia zza su

Halcar ci a yar ca maelmaerjia leil ser nia. Arbosobo dax bei mae su mel nael Yisu dax cirgo a hher. Arbosobo dax bei nr mae su mel nael Yisu dax bbe kae a, dixlyuxl gga zeu nia. Martaexl Sul 24 nei 25, halae Qirsixlluxl Sul gga halcar ci a arsaesael nga var biar dae.

^k**13:14** *Cirza-hanga lei bei xiaxr gger su yarzi vuxlsuxrddo hal te yar ngier mi-nr-bbe halmaex ngier dae* Ca eil te mel Arbosobo ddei xi

ca mel saexl nia. Yar ngier dae car, Yoxrtaexl mermi hher dae ca mel dder worga leil pa deix nia; ¹⁵ xipaebbor^l hher dae mel lei ake ddir jjixr a, zzaegu vei jjixr nr ddo; ¹⁶ mi gga hher dae ca mel lei jjixr a ake pia vei jjixr nr ddo. ¹⁷ Nixixl hal cir ni ci a mel, aniuixniar su nei aniuix baxr dax su mel dder yarzi goxr sol a. ¹⁸ Nia Arbosobo leil qiuxr nia, yel eine nga car a zzixzi ggur lol nr ddo. ¹⁹ Nixixl hal ddei ci a mel cirza-hanga yarzisael gexrddo zza var, Arbosobo merlo-milo bei beil halleix cirdae a eilleix zzeze lei hal mel sael a gexrddo zza nr goxr; eine goxr ho a mel zeixleixr lei eil mel sael a zza nr var a. ²⁰ Yel Seirpor nixixl hal mel nga-nr-niul lol arddeirnga a mel, ca hazza mel dder si lalnga a; nael Arbosobo mel yar tiur har dae ca mel leil weix a, nixixl hal mel nganiul lol var. ²¹⁻²² Hane ci a mel, Zidu yarjjar nei xiezi yarjjar mel ddux lei a, ddoddomo murgurgurmo bei a, ca leil fur. Yaa halae nia Arbosobo leil ddarzzi su mel leil lei fur niazzir, yel si nia leil bbeix: ‘Zidu eilmaex hher dae,’ bbeixsael ‘Zidu halmaex hher dae’ bbeix arddeirnga a, nia ddarzzi nr ddo. Eine nga a mel yaa dder nia leil fur wo nr xie a. ²³ Ngo doxl nia leil hoba bbeix gger zaxr ho a lo ngo! Yel nia fadae nia!

²⁴ Cirza-hanga lei yarzi gexrddo nixixl hal mel goxr jixr ho a mel,

‘merni taex lei neixmar a;

xiubbo taex lei nr bbo a;

²⁵ gie mel lei de zei lei a;

merlabbor hher dae mel lei le du lei nia.’^m

seirceix-seirmaer hal giex gga ngier dae a yar mel Arbosobo a eine bbeix.

^l**13:15** *xipaebbor* Yoxrtaexl su ca mel ddei xipaebbor mel bbaelerler arddeir a. Yaa zoxlzoxl lei nalbbor miar bei.

^m**13:25** Yirsaexlyal Sul 13:10 nei 34:4 leil vaexr dae.

²⁶ Hane ci a mel, yaa dder Ca Ddei Ssor ddei bbobbolbbo zico ddei leil zzi dae a, yarzi ddo lei ggie mia nia. ²⁷ Yar yar ddei tisir mel leil zi a, middurbbor cirmaex-hanga, mer woxrke eil piar a cirdae a hal piar a zzeze, yar tiur har dae ca mel leil ae pex du lei lol.

²⁸ Nia vuxrhuagol zzei zzei leil bir dae a bbeix dae ar ddei zza wo ddo. Vuxrhuagol zzei leil yarniux niux teixl lei ggie mia a, nia dder gielcozi ci jjur a saexl a. ²⁹ Eine nga a, nia ngo nia leil biar gger dae eil mel leil mia a mel, nia dder ngo jjixr lei zi ci jjur a saexl a; hherdder alddur ggucirmi hher dae sael a nga a. ³⁰ Ngo nia leil yarzi bbeix gger, ca eil coxr halae nr si seir, cirza-hanga eil mel dder nga var a. ³¹ Mer lei mier var, mi lei mier var, nael ngo ddei ddar mel mier nr var.

³² Nixixl hal cir ni arddolcar a mel arseir lei nr saexl, merlabbor hher dae tisir mel lei nr saexl, Arbosobo ddei Ssor ddei lei nr saexl, Arbbor Arbosobo lar saexl. ³³ Nia nixixl hal cir ni arddolcar a nr saexl, yel nia fadae nia, ngo leil xia dae nia. ³⁴ Eil mel mel hherdder ca ar ddei a, ake nr hher kebal mermi ssi mel sael a nga. Yar yar ddei quexrlixl mel yar leil visser su ca mel leil gger a, halae ca cirddeir-hanga leil azo lerler miar bei nia miardal, yoxl alddur su su ca ddei leil miardal a alddur su car a zucur dae nia.

³⁵ Ca seirpor ddei neixmar a jjixr lei, bbeixsael merxixl-soxiu jjixr lei, bbeixsael yixpe bbe a jjixr lei, bbeixsael merteir a sael jjixr lei nia nr saexl, yel nia cirleixr nr nor yar leil xia dae nia. ³⁶ Algaxl ca seirpor ddei neixleixrsael jjixr lei a mel, nia yixrmeixljjiu dae a yar mia a. ³⁷ Ngo nia leil bbeix gger dae ddar eil mel mel ca maelmaerjjia leil bbeix gger dae arddeir a; yel nia zucur dae nia.”

Nerxiuxiumo Hal Mel Yisu Oldde Leil Dox Deix Gger

¹ Zeixleixr nr ni goxr a mel dder Yuelyuel jiax nei miljiazi ji nr goxr aba zzor jiax nga a.ⁿ Arbosobo leil zi su vaervaerpor mel nei Arbosobo ddei sulsaxlsu mel dder, arsaе Yisu leil ker ssu du lei a, bei zil gger nia zziбbe. ² Nael yaa bbeix: “Jiax ddei gga mel yar leil arsaе lei bei nr ddo, nr nga a ca mel luaxl du lei lei.”

³ Giedae Yisu Boxrdaxlnixr kax gga nopae goxr Ximexr mi hal hhexr ake hher dae a zzo zzor dae car, ssormaer ar ddei a mel yar dax lei a. Yar yol bbie ar taex vei dae, bbie taex gga mel nerxiuxiumo ssuvi yarzi naxrcixl ar mel ji dae. Yar yol bbie taex deil peixl gger a, nerxiuxiumo hal mel Yisu oldde ddei leil dox deix gger a.

⁴ Yel ca ar mel mel a sirzzi a bbeix: “Nerxiuxiu eil mel eine bei holpixl a azo bei bbeixleir? ⁵ Yarzi ner xiu ssuvi eil bbie vur ssi a mel, ca ar ddei ddei cir koxl meirne worper nga a; yel casolssor cirke leil beijjiu cexr.” Yaa dder ssormaer eil ddei leil hie.

⁶⁻⁷ Yisu dder yaa leil ddarkoxl a bbeix: “Nia arsaenga a yar leil bei sol lol? Yar ngo leil miar yarzi seir ar jji bei gger a. Casolssor mel mel zoxlzoxl a nia dax cirgo a hher dae, nia yaa leil beijjiu niazzir a mel, arddolcar lei beijjiu cexr. Nael ngo mel nia dax cirgo a hher nr doxr dae, yel yar leil bei lol! ⁸ Yar mel, yar arsaе bei var mel dder arsaе bei dae a. Yar nerxiuxiumo eil mel ngo leil dox deix gger a mel, ngo leil giexlhex du a ngo ggecir ddei leil bei har zaxr gger dae arddeir a. ⁹ Ngo nia leil yarzi bbeix gger, ngo ddei ddar seirseir mel mer woxrke arddolmaex gga biar ci zzorbbeixlei, ca mel ssormaer eil ddei bei dae eil mel leil biar nia, yel ca mel leil yar leil holcir dae lol.”

ⁿ**14:1** Cu'aezixr Sul 12 leil arsaenga a Yirsaexllixl su ca mel Yuelyuel jiax goxr nei miljiazi ji nr goxr aba zzor jiax goxr biar dae.

Yuelyuel Jiax Goxr

¹⁰ Yisu miardal dae ca ceinirmo gga Jialuxl mermi su Yoxrdaxl mi hal ddei mel Arbosobo leil zi su vaervaerpor mel dax ssi a Yisu leil yaa leil jia gger niazzir. ¹¹ Yaa dder ggese zildu a, yel yar leil piu gger ddarkoxl dae a. Yoxrdaxl dder arsae bei a saelnei Yisu leil yaa leil jia gger cexr xiar doxr dae a.

¹² Miljiazi ji nr goxr aba zzor jiax goxr beil cir ni mel, hherdder yassor seixl zi nia Yuelyuel jiax hal cir ni nga a; Yisu dax mae dae ca mel yar leil biex lei a bbeix: “Ni ngua leil arddolmaex gga, ni leil Yuelyuel jiax goxr a, zzorlabox bei har zaxr gger lol?”

¹³ Yisu dder yar dax mae dae ca nnel leil miardal teixl a bbeix: “Nia zzi gga ddir a, ajjix ar olbbexr bil dae capor ar ddei a mel nia dax zzi var, yel nia dder yar dax mae dae. ¹⁴ Yar arddol hhexr dax ddir mel, nia dder hal hhexr ca seirpor ddei leil bbeix: ‘Ngo ddei sulmulsu bbeix: “Ngo arddol giex gga ngo dax mae dae ca mel dax cirgo a Yuelyuel jiax goxr a zzorlabox zzor nia,” ’ eine bbeix a. ¹⁵ Yar dder nia leil lebbor geso har ho xi vaervaer ar giex i lol var, nia dder halmaex gga bei har zaxr dae ddo a.”

¹⁶ Yar dax mae dae ca mel dder ssi a, yaa zzi gga ddir car a, yaa mia mel dder Yisu bbeix dae mel sael a nga a. Yel yaa dder Yuelyuel jiax goxr a zzorlabox bei har zaxr ssi a.

¹⁷ Eilmerxiyl ci a, Yisu nei yar miardal dae ca ceinirmo dder ssi a. ¹⁸ Yaa cirgo a halmaex cux dae a zzor car, Yisu yaa leil bbeix: “Ngo nia leil yarzi bbeix gger, nia ca mel gga ngo dax cirgo a zzo zzor su mel ngo leil vurllelsu ar ddei zza.”

¹⁹ Yar dax mae dae ca mel dder yarzisael zzasol a, cirddeir-cirddeir yar leil biex a bbeix: “Ngo nr nga piar a mar!”

²⁰ Yisu yaa leil bbeix: “Nia ceinirmo gga, leixrhher ddei ngo dax cirgo a

ddorbax gga aba xiel leil dae hal ddei dder nga a. ²¹ Ca Ddei Ssor mel arsaebeilei Arbosobo Ddei Sul ber leil vaexr dae mel sael a si nia, nael yar leil vurler su ca ddei zoxr a! Ca eil ddei leil xiu nr teixl lei arddeirnga a halae seir a.”

²² Yaa zzo zzor dae car, Yisu aba ar pir vei du lei a, Arbosobo leil nawo ho a dder ngaxl kae a, yar dax mae dae ca mel leil zzi gger a bbeix: “Eil ddei mel ngo ddei ggecir ddei nga a. Nia vei dae a zzor.”

²³ Yoxl beizi ddei vei du lei a, Arbosobo leil nawo ho a yaa leil zzi gger, yel yaa dder dda a.

²⁴ Yisu bbeix: “Puxrto zzipbaer eil ddei mel ngo ddei sirnilni ddei nga a; ca cirke leil weix a ddux nia. Eil ddei mel dder Arbosobo bbeix har zaxr dae ddei nga a.” ^o ²⁵ Ngo nia leil yarzi bbeix gger: Eilni cirdae a ngo zeixleixr lei nia dax cirgo a puxrto zzipbaer nr dda a; hherdder ngo nia dax cirgo a Arbosobo ddei goxr ddei gga puxrto zzipbaer yarsixl dda hal cir ni ci a sael dda a.”

²⁶ Yaa caxlgo caxl ho a dder ddux a, Saercor worga hal ga leil ssi a.

Yisu Birdaexr Yar Leil Nr Ssexl Bei Var Bbeix Har Zaxr

²⁷ Giedae Yisu yaa leil bbeix: “Nia maelmaerjjia lei ngo dax nr hher ssi du si var. Arbosobo Ddei Sul ber leil vaexr dae a Arbosobo bbeix:

‘Ngo yaloxlmo ddei leil deil a,
ya mel dder ssi bbeir jjia si a,’^p

eine bbeix a.

²⁸ Nael ngo gol du xixl lei ho a, ngo nia xilmeir leil Jialixllixl mermi ssi

^o**14:24** Xiboxrlaexr Sul 8:7–9:28 leil biar dae.

^p**14:27** Sarjialixlyal Sul 13:7 leil vaexr dae.

nia.”

²⁹ Birdaexr bbeix: “Arseir lei ni leil pa du si zzorbbeixlei, ngo arsaebeilei pa nr var.”

³⁰ Yel Yisu yar leil bbeix: “Ngo ni leil yarzi bbeix gger, eilmei yixpe nr boxl bbe xilmeir leil, ni ngo leil nr ssexl so boxl bei var.”

³¹ Birdaexr dder hhelhelmo ddarkoxl a bbeix: “Ni dax cirgo a si nia zzorbbeixlei, ngo ni leil nr ssexl bei nr var.” Kebal Yisu dax mae dae ca mel lei eine bbeix a.

Kelsimarnixr Hher Dae A Arbosobo Dax Ddar Biar

³² Giedae yaa mel Kelsimarnixr mi halmaex ssi ci a. Yisu dder yar dax mae dae ca mel leil bbeix: “Nia eilmaex cux dae a ngo leil xia dae, ngo Arbosobo dax ddar biar ssi.” ³³ Yel yar dder Birdaexr, Yargel nei Yuehal yaa soler leil hier dax si a. Halcar mel yar mel nixmox zzar yarzi zzasol, cix zildu a. ³⁴ Yar dder yaa leil bbeix: “Ngo nixmox zzar zzasol zildu a si niazzir dae a. Nia eilmaex gga hher dae a, zucur dae nia.”

³⁵ Yar nael lalal sael ardoxr ssi gel a dder middur ddei leil puxr gex dae a, Arbosobo dax ddar biar a bbeix, bei cexr arddeirnga a, yar leil yarzisael goxr sol eil mel tor nr goxr lol. ³⁶ Yar bbeix: “Abaxl^q Arbbor ni mel azo lei bei ci xie, yel ni leil qiuxr yarzisael goxr sol eil mel ngo leil tor nr goxr lol, nael ni dax zox lalssa, ngo dax zox nr ssa.”

³⁷ Yisu yar dax mae dae ca hal soler dax jjixr lei a, yaa yixrmeixljjiu dae mia a dder, Birdaexr leil bbeix: “Ximexr Birdaexr ni yixrmeixljjiu dae a ngo? Ni ngo dax cirgo a zucur dae nr ddo a ngo? ³⁸ Nia zucur dae a Arbosobo dax ddar biar nia. Nr nga a mel nia leil sixr i var mel pex dae car, nia zuixl bei ssi leilei, nia ddei xiu ddei Arbosobo dax ddar biar niazzir dae lei, nael ggecir ddei bei wor-nr-ni a.”

^q**14:36** *Abax/Abaxl* ddei yilsi mel dder arbbor.

³⁹ Yisu yoxl Arbosobo dax ddar biar ssi a. Ddar biar dae mel mel xilmeir dax ciryoxr a nga. ⁴⁰ Yar biar teixl a jjixr lei a yoxl yaa leil yixrmeixljjiu dae ggie mia a. Yaa mel yixrmeixlzzir zildu a meixddur ddei lei pu du lei nr xie a, yaa lei arsae bbeix nia lei nr saexl a.

⁴¹ Yar so boxl ddei biar teixl a jjixr lei car a, yaa leil bbeix: “Eilcar a nia halae yixrmeixljjiu dae a, wornol doxr dae a ngo? Nia yixrmeixljjiu doxr dae la ddo a! Nixixl ddei ci a. Nia i dae la ddo a. Ca Ddei Ssor leil zuixl zza ca mel leixrga gga vur ji gger du a. ⁴² Ha du la a, niul ssi du a. Nia i ddo a. Ngo leil vurlel su ddei lei a.”

Yisu Leil Ssu Gex Du Lei

⁴³ Yaa ddar biar dae car a malmal, Yisu miardal dae ca ceinirmo gga Yoxrdaxl te mel lei a. Yar dax mel halae altor nei zzargger vei dae ca seirseil ar ke ca dae. Ca eil mel mel Arbosobo leil zi su vaervaerpor mel, Arbosobo ddei sulsaxlsu mel, nei ca leil guaxr su camar mel miardal si lei.

⁴⁴ Yisu leil vurlel su Yoxrdaxl te yaa leil Yisu arseir a saexl lol a bbeix: “Ngo meir ddei arseir leil jiuxl ssi a mel arseir dder Yisu nga a. Nia dder yar leil ssu gex du lei a, hier si ddo a.” ⁴⁵ Yoxrdaxl te dder Yisu dax lei a bbeix: “Labir”^s bbaexl ae a yar leil jiuxl ssi. ⁴⁶ Yaa dder Yisu leil ssu gex du lei a. ⁴⁷ Yel Yisu dax ngier dax dae ca ar ddei a mel altor baxr vei teixl lei a, Arbosobo leil zi su vaer zzir ddei leil visser su ar ddei leil ar pi taexl gger a, yar leil nolba ar bbor taexl teixl gger a.

⁴⁸ Yisu yaa leil bbeix: “Nia altor nei zzargger vei dae a ngo leil ssu lei a, ngo leil vaervaerpor leil dir su ar ddei i mal gger a ngo? ⁴⁹ Ngo bbecir-bbeni Arbosobo ddei xi zzaexggu gga ca leil mul gger a, nia dax cirgo a hher dax dae car a zzael nia ngo leil nr ssu. Nael nia eine bei a

^s14:45 *Labir* Labir ddei yilsi mel dder sulmulu.

mel dder, Arbosobo Ddei Sul ber leil ngo arsaer lerler nga nia bbeix goxr ddar mel yarzi loxr a,” eine bbeix a.⁵⁰ Halcar malmal yar dax mae dae ca maelmaerjia lei yar dax nr hher pa du si a.

⁵¹ Caleixlssor ar ddei a mel, zzir bei teixl lei mae ar co veixr dae a Yisu dax mae dae, yel ca mel yar leil ssu a,⁵² yar mae co piar pixl gger a gorni-gorlael pa du si a.

Yoxrtaexl Su Vaervaerpor Yisu Leil Ser

⁵³ Giedae Yisu leil ssu su ca mel, yar leil Arbosobo leil zi su vaer zzir ddei dax hier mal. Halcar a mel Arbosobo leil zi su vaervaerpor mel nei ca leil guaxr su camar mel, halae Arbosobo ddei sulsaexlsu mel maelmaerjia cirgo a Arbosobo leil zi su vaer zzir ddei dax hher dae a.

⁵⁴ Birdaexr nael vimirmir sael Yisu dax mae dae a, Arbosobo leil zi su vaer zzir ddei zzaexggu gga mae ci a dder meixr mel dax cirgo a cux dae a, adoxl ga dae a.

⁵⁵ Arbosobo leil zi su vaervaerpor mel nei kebal Yoxrtaexl su vaervaerpor maelmaerjia lei Yisu ddar bbeix nr hoxr nei bei nr hoxr mel zo a, Yisu leil goxl a yar leil bei zil gger niazzir, nael yaa zo wo nr xie.

⁵⁶ Ca cirke a nga-nr-zi mel bbeix a Yisu leil goxl a lei, nael yaa bbeix dae mel zzicarzzi dax nr hoxr.

⁵⁷ Yoxl ca ar mel a ngier du lei a nga-nr-zi mel bbeix a yar leil goxl a bbeix: ⁵⁸ “Ngua bbejjiur a ca eil ddei bbeix: ‘Ngo ca mel zi du lei Arbosobo ddei xi zzir caexr pixl gger a, so ni dder ar zzir zi du box lei xie. Eil zzir mel ca mel zi nr nga,’ ” eine bbeix a. ⁵⁹ Ca mel yar leil eine goxl a lei, nael halae zzicarzzi dax bbeix nr hoxr.

⁶⁰ Yel Arbosobo leil zi su vaer zzir ddei dder ngier du lei a Yisu leil bbeix: “Ca mel ni leil eine ar zzu goxl dae lei, ni arsaenga a cir za lei ddar-nr-koxl leir?” ⁶¹ Nael Yisu zzael arjjiuljjiu arla hher dae lalnga. Yel Arbosobo leil zi su vaer zzir ddei yoxl yar leil biex a bbeix: “Ni Arbosobo

ddei Ssor Zidu nga nga?”

⁶² Yisu ddarkoxl a bbeix: “Nga a mar! Ngo nia leil bbeix gger, arddolcar a nia Ca Ddei Ssor ddei mel yarzi ddo Arbosobo ddei yo piar a gga cux dae a, halae zico ddei leil zzi dae a jjixr lei ggie mia nia.”

⁶³ Arbosobo leil zi su vaer zzir ddei dder pia xiux si xiaxr gger a bbeix: “Niul zeixleixr lei arseir bbeix ggie noni nr ssa a. ⁶⁴ Yar ddar vaer te a Arbosobo leil bbeix vuxryixr a nia lei bbejjiur a. Nia zzir dae a yar leil arsae bei nia?”

Yaa dder yar leil si nia zuixl dixl gger a. ⁶⁵ Yel ca ar mel a yar leil zixlvixrpir deix gger, yoxl yar meixddur ddei leil bbe gex du lei a yar leil cur a bbeix: “Ni doxl xiezi a zzarmar? Ngua leil bbeix gger la, ni leil deil su ddei arseir a?” Meixr mel yoxl yar leil gga gel lei a, yar leil deil.

Birdaexr Yisu Leil So Boxl Nr Ssexl

⁶⁶ Birdaexr lamaebbaer zzaexggu gga hher dae car, Arbosobo leil zi su vaer zzir ddei leil visser su ssormaer ar ddei lei a. ⁶⁷ Yar Birdaexr adoxl ga dae mia a dder, yar leil i dae a bbeix: “Ni lei Naxrsalexl su ca Yisu dax cirgo a nga.”

⁶⁸ Birdaexr dder cexr-nr-ssexl a bbeix: “Ni azo bbeix dae ngo nr saexl.” Yel yar zzaexggu ddei gga ddux lei a ggucirmi hher dae a dder yixpe bbe a.

⁶⁹ Ssormaer hal ddei yoxl yar leil mia a halbbaer ngier dae ca mel dax bbeix: “Ca eil ddei lei yaa dax cirgo a nga.” ⁷⁰ Birdaexr yoxl cexr-nr-ssexl. Hormo arleixr nr goxr, halmaex ngier dae ca mel yoxl Birdaexr leil bbeix: “Ni lei Jialixllixl mermi su ca a; yel ni yarzi yar dax cirgo a nga.”

⁷¹ Birdaexr dder larhorhormo bbeix a bbeix: “Ngo yarzi nia bbeix dae ca hal ddei leil nr saexl. Ngo baexr arddeirnga a, Arbosobo ngo leil faxr lol ddo.”

⁷²Halcar a malmal yixpe nr boxl ddei bbe a; Birdaexr dder Yisu yar dax bbeix goxr ddar mel leil holcir du lei a. Yisu bbeix: “Yixpe nr boxl bbe xilmeir leil ni ngo leil nr ssexl so boxl bei var.” Yel yar mel zzasol zildu a nge dae a.

15

Birlado Meixsaer Qier Leil Yisu Leil Ser

¹Giedae merteir a, Arbosobo leil zi su vaervaerpor mel, ca leil guaxr su camar mel, Arbosobo ddei sulsaxelsu mel, Yoxrtaexl su ca ddei vaervaerpor maelmaerjjia dder zzibbe a, Yisu leil neixl gex du lei a Birlado mi Loxrmar su Yoxrtaexl mermi vaervaerpor bei dae hal ddei dax gga mal gger.

²Birlado yar leil biex a bbeix: “Ni Yoxrtaexl su ca ddei zzirmar a ngo?”

Yisu yar leil ddarkoxl a bbeix: “Ni bbeix hoxr a.”

³Arbosobo leil zi su vaervaerpor mel Yisu leil cirza-hanga lei seirseil ar ke goxl dae. ⁴Yel Birlado yar leil bbeix: “Ni ardae i, yaa ni leil eine ar zzu goxl dae lei ni ddar-nr-koxl a ngo?”

⁵Yisu halae cir qier lei ddar-nr-koxl a, Birlado ddei lei yarzisael murgur.

Yisu Leil Si Nia Zuixl Dixl Gger

⁶Bbecir-bbekoxl Yuelyuel jiex ci a, Birlado mel ca mel yar dax qiuxr dae mel dax zox dae a, yaa leil ge ji dae ca ar ddei piur gger eine bei zzawo.

⁷Halcar a malmal mel ge ji dae ca ar ddei zza. Yar leil Balaba mi. Yar mel buxlguaxr-laxlsixr bei a ca seixl goxr a; yel yar leil kebal Loxrmar goxrjia leil dir su mel dax cirgo a ge ji dae. ⁸Ca mel dder Birlado leil qiuxr ssi a, zoxlzoxl sael a yaa leil ge ji dae ca ar ddei piur gger lol.

⁹⁻¹⁰Arbosobo leil zi su vaervaerpor mel Yisu leil ssu du lei a mel, yar leil

nixnox a ssu arddeir a Birlado saexl, yel yar yaa leil bbeix: “Nia ngo leil nia leil Yoxrtaexl su ddei zzirmar ddei leil piur gger lol nga nga?” ¹¹ Nael Arbosobo leil zi su vaervaerpor mel ca mel leil co a, Balaba leil piur qiuxr lol.

¹² Birlado yoxl bbeix: “Halmel, nia Yoxrtaexl su ddei zzirmar a bbeix dae hal ddei leil ngo arsae bei neil?”

¹³ Yaa dder ae doxr dae a bbeix: “Yar leil sixrzixljiaxl leil diexr zil gger!”

¹⁴ Birlado bbeix: “Arsaenga a? Yar azo bei nr sir bei a leir?”

Yaa gielgiel worcixl-worni ae dae a bbeix: “Yar leil sixrzixljiaxl leil diexr zil gger!”

¹⁵ Birlado dder ca mel leil ggesse lol a, Balaba leil yaa leil piur gger a. Yisu leil nael lorddu sser a ar pu deil gger a ca mel leil jia gger a sixrzixljiaxl leil diexr zil ssi lol a.

Meixr Mel Yisu Leil Vaessi

¹⁶ Meixr mel dder Yisu leil Birlado hher ggie zzaexggu gga hier dil a, meixr circir-lorbba leil halmaex ae pex si lei a. ¹⁷ Yel Yisu leil jjiussi yixrsaexr pia darsisimo ar xiux veixr gger, halae alcur sser a oldde ddei leil ddexrlabox ar ddei bei a yar leil ddexr gex gger, ^t ¹⁸ yel yar leil vaessi a bbeix: “Yoxrtaexl su ddei zzirmar, ni leil olga si lol nia!” ¹⁹ Yoxl zzargger ar caex vei a yar oldde ddei leil deil doxr, halae yar qiaxrmeix ddei leil zixlvixrpir deix gger a, cizixl gger dae a yar leil zi laexl. ²⁰ Yaa yar leil bbeix vuxryixr teixl ho a dder jjiussi yixrsaexr pia darsisi xiux lixr teixl gger a, yar armael ddei pia mel veixr gex xixl gger a. Yel yar leil

^t**15:17** Halcar a mel zzirmar mel mel jjiussi yixrsaexr pia darsisimo veixr halae oldde leil ddexrlabox yarzi naxrcixl ar ddei ddexr, yel meixr mel Yisu leil eine bei gger a mel yar leil vaessi nga arddeir a.

hier teixl a sixrzixljiaxl leil diexr ngexl gger ssi.

Yisu Leil Sixrzixljiaxl Leil Diexr Ngexl Gger

²¹ Jiajia Gurlixlnaexl su ca ar ddei a mel zzi maelleil lei a halmaex ssi gel ggur. Yar leil mel Ximexr mi. Yar mel Yallixlsadaxl nei Lurful yarbbor a. Meixr mel dder yar leil ddoddo-nrddo yaa dax cirgo a ssi lol a, Yisu ddei sixrzixljiaxl ddei bber dae lol. ²² Yaa mel Yisu leil Gexrgexrta ae halmaex hier ci a. Gexrgexrta ddei yilsu mel dder olggargex mermi.

²³ Yaa yoxl moxlyoxl ggiex dax dae puxrto zzibbaer mel Yisu leil dda lol, nael yar nr dda. ²⁴ Giedae yaa dder yar leil sixrzixljiaxl leil diexr ngexl gger a. Yoxl yar ddei pia mel bbe kae gger a nijiu, yel arseir li wo bbe i.

²⁵ Yaa Yisu leil sixrzixljiaxl leil diexr ngexl gger car a mel eilneixrnehe 9:00 ci a. ²⁶ Yisu leil diexr gex dae sixrzixljiaxl ddei ollele mel barpir ar co diexr ngexl gger a. Barpir co leil mel yar leil goxl dae zuixl mel vaexr deix dae a bbeix: “Yoxrtaexl Su Ddei Zzirmar A.” ²⁷ Yaa yoxl zzaexpor rnel leil lei Yisu dax cirter a sixrzixljiaxl leil diexr zil gger a; cir ddei a nael yar yo piar a gga, cir ddei a nael yar vael piar a gga. ²⁸ [Eil mel eine nga a mel dder, Arbosobo Ddei Sul ber leil bbeix dae mel yarzi loxr a. Arbosobo Ddei Sul ber leil bbeix: “Yar leil mel zuixl zza ca mel sael a bei zil gger a.”]^u ²⁹ Halmaex ssi gel su ca mel lei oldde taex veil dae a yar leil vaessi a bbeix: “Ae! Ni doxl Arbosobo ddei xi zzir caexr pixl gger a so ni dder zi du xixl lei xie bbeix goxr a; ³⁰ ni armael leil jiuxl ddo a! Ni sixrzixljiaxl leil zei lei ddo a!”

³¹ Arbosobo leil zi su vaervaerpor nei Arbosobo ddei sulsaexlsu mel lei

^u**15:28** *Eil mel eine nga a mel dder, Arbosobo Ddei Sul ber leil bbeix dae mel yarzi loxr a. Arbosobo Ddei Sul ber leil bbeix: “Yar leil mel zuixl zza ca mel sael a bei zil gger a”* Arbosobo Ddei Sul cirberber leil a eil qier nr zza.

yar leil eil mel sael a bbeix vuxryixr a bbeix: “Yar si leil jiuxl var arnar, armael leil jiuxl nr var bbe! ³² Yar doxl nr nga Yirsaexllixl su ca ddei zzirmar Zidu ddei nga a zzarmar? Yar eilcar a dder sixrzixljiaxl leil zei lei ddo a; yel ngua mia a dder yar leil ddarzzi.” Yar dax cirgo a sixrzixljiaxl leil diexr ngexl gger ca mel lei yar leil eil mel sael a bbeix vuxryixr.

Yisu Si

³³ Eilnirggu 12:00 cirdae a 3:00 zzezze lei merni taex leil neixmarmarmo jiul gex dae a, cirmaex-hanga lei neixmar jjia a.

³⁴ Eilnirggu 3:00 ci a, Yisu worcixl-worni ae dae a bbeix: “Yirloxryi, Yirloxryi, lamar sarbagexrdaxlnixr?” Yilsi mel dder bbeix: “Ngo ddei Arbosobo, ngo ddei Arbosobo, ni arsaenga a ngo leil nr guaxr?”

³⁵ Halmaex ngier dae ca cirmelmel a bbejjiur a dder bbeix: “Nia noni dae la. Yar xiezi Yirlixlyal leil ae dae a!”

³⁶ Ca ar ddei a dder beix gel a, hielmixr ar ddei vei a puxrto zzbbaer zeilzei gga arleixr niuxl a, zzargger caex leil neixl gex a yar leil dda lol, yoxl bbeix: “Xia dae a, Yirlixlyal yar leil piur zei zei lei bbe arleixr i.”

³⁷ Giedae Yisu mel worcixl-worni ae dae a, seixl ddei dder ceix a.

³⁸ Yel Arbosobo ddei xi gga, lavulzzar mae giex gex dae co dder ggaxrsi cirdae a, jiasi zzezze lei nr bbaexrlaexr si mal si a. ³⁹ Yisu xilmeir ngier dae meixr cirxiu guaxr su vaervaerpor ddei mel Yisu eine ae dae bbejjiur nei yar arsae si ggie mia a, yel dder bbeix: “Ca eil ddei yarzi Arbosobo ddei Ssor a bbe!”

⁴⁰ Ssormaer cirke a lei vimirmir sael hher dae a i dae. Ssormaer eil mel gga mel Moxrdaxlla su Marlixlyal ddei ca dae, Yargel yelye nei Yuexi yarma Marlixlyal ddei lei ca dae, halae Sarloxrmir lei ca dae. ⁴¹ Yaa mel Yisu Jialixllixl mermi hher dae car a dder yar dax mae dae a, zoxlzoxl a yar leil visser. Halae Yisu dax cirgo a Yiluxlsaler zzi gga ssi su ssormaer

cirke a lei halmaex hher dae.

Yisu Leil Giexlhex

⁴² Hal cir ni mel dder wornol nixixl cir ni xilmeir hal cir ni nga a. Hal cir ni mel cirza-hanga bei har zaxr nia. Mercixl car ⁴³ Yallixlmartaexl zzi gga su Yuesaexl mi ca hal ddei lei a. Yar mel Yoxrtaexl su ddei vaervaerpor ar ddei a; ca mel lei yar leil yarzi i du. Yar Arbosobo leil xia dae a ca mel ddei zzirmar bei lei. Yar nixmox vaervaermo bei dae a Birlado leil Yisu ddei ggecir ddei yar leil jia gger la qiuxr ssi. ⁴⁴ Birlado lei Yisu eine cirleixr a dder si a bbejjiur a yarzi murgur, yel meixr cirxiu guaxr su vaervaerpor ddei leil ae si lei a, Yisu si arsaesael arcixl loxr a biex. ⁴⁵ Meixr cirxiu guaxr su vaervaerpor ddei yar leil bbeix gger ho a, yar dder Yisu ddei ggecir ddei Yuesaexl leil jia ji gger lol a. ⁴⁶ Yuesaexl mel zzir bei teixl lei mae ar mel vae a, Yisu ddei ggecir ddei vei zei lei a ba gex du lei a, yel lixrbbaex doxli ar ddei gga dol ji dae. Lixrbbaex doxli eil ddei mel yar legelbbe cili gga giexl teixl lei arddeir a. Yar yoxl legelbbe vaervaer ar taex guir gel lei a, lixrbbaex doxli ddei ddaexrcir gger a. ⁴⁷ Moxrdaxlla su Marlixlyal nei Yuexi yarma Marlixlyal lei Yisu ggecir ddei halmaex dol ji ggje mia a.

16

Yisu Si Ho A Yoxl Gol Du Xixl Lei

¹ Moxrdaxlla su Marlixlyal nei Yargel yarma Marlixlyal, halae Sarloxrmir yaa mel ggecir leil meilabox nerxiuxiu mel vae dol dae a, wornol nixixl^v cir ni goxr jjia ho a, Yisu ggecir ddei leil mei ssi niazzir dae.

^v**16:1** *wornol nixixl*/Yoxrtaexl su ddei wornol nixixl cir ni mel xiqiluxr cir ni a. Yel Yisu gol du xixl lei cir ni mel xiqiti cir ni a. Nael Yisu gol du xixl lei ho cirdae mel Yisu leil ddarzzi su mel mel xiqiti cir ni wornol nixixl

² Xiqiti cir ni merteir a, merni ddux lei a qie, yaa dder lixrbaex ddei dax lei ci a. ³⁻⁴ Lixrbaex doxzi leil guir gex dae legelbbe taex mel yarzi vaer ar taex a, yel yaa dder zzicarzzi dax bbeix: “Arseir niul leil lixrbaex doxzi leil guir gex dae legelbbe taex va kae gger bbeixleir?” Nael yaa i saexl a qie legelbbe taex mel va kae ho a. ⁵ Yel yaa dder lixrbaex doxzi ddei gga ddir a, pia darsisimo piutaexltaexlmo veixr dae caleixlssor ar ddei a, Yisu ggecir ddei dol ggie yo piar a cux dae mia a dder gexr zildu a.

⁶ Caleixlssor hal ddei yaa leil bbeix: “Nia gexr nr ssa, nia sixrzixljiaxl leil diexr ngexl gger goxr, Naxrsalexl su ca Yisu leil zo mel ngo saexl. Nael yar gol du xixl lei ho a. Yar eilmaex nr hher dae a. Nia i lar. Eilmaex mel dder yar leil dol ggie nga a. ⁷ Nia jjixr a yar dax mae dae ca mel leil nei Birdaexr leil bbeix: ‘Yar nia xilmeir leil Jialixllixl mermi ssi. Nia halmaex gga yar leil mia ddo,’ eine bbeix gger jjixr. Hherdder halleix yar nia leil bbeix gger zaxr goxr mel sael a nga a,” eine bbeix a.

⁸ Yaa mel gexr zzae gexr, mur zzae murgur, yel dder ddux lei a lixrbaex ddei dax nr hher pa xixl lei a. Yaa gexr zildu a dder ca mel leil azo lei bbeix nr gger.

Arbosobo Ddei Sul cirberber leil a mel 16:9-20 nr zza.

Yisu Yar Dax Mae Dae Su Ca Mel Leil Mia Lol

⁹ Yisu mel xiqiti cir ni merteir a qie, gol du xixl lei a. Yar hoba Moxrdaxlla su Marlixlyal leil mia lol beil a. Halleix Yisu yar ggecir gga neir sir te ggaxr teixl lei goxr a. ¹⁰ Yar Yisu leil mia ho a dder, Yisu dax mae dae ca mel leil bbeix gger ssi. Halcar a malmal yaa mel cix a nge dae. ¹¹ Yaa Yisu si a yoxl gol du xixl lei ho a, yel Marlixlyal leil mia lol a

goxr.

bbejjiur a lei ddar-nr-zzi.

¹² Eine goxr ho a, Yisu dax mae dae ca mel gga ca nnel a mel, kax ar ddei gga ssi a, yel yaa jjiumo gga ssi dae car, Yisu mel yaxlzi ddei bixl a, yaa leil mia lol a. ¹³ Yaa dder kebal Yisu dax mae dae ca mel leil bbeix gger ssi a. Nael yaa mel halae ddar-nr-zzi.

¹⁴ Giedae Yisu dax mae dae ca hal ceidilmo zzo zzor dae car, Yisu yaa leil mia lol a. Nael yaa mel Yisu gol du xixl lei ho a, yar leil mia beil su ca mel leil ddar-nr-zzi, yaa ddei ddar noni dil nr xie; Yisu leil ddarzzi gax-nr-zi a, Yisu dder yaa leil bota.

Yisu Yar Dax Mae Dae Ca Leil Miardal Teixl

¹⁵ Yisu yoxl yaa leil bbeix: “Nia mer woxrke cirmaex-hanga ssi a, circuxr-hanga ca mel leil ngo ddei ddar seirseir mel biar gger ssi nia.

¹⁶ Ngo leil ddarzzi a sexlsir su ca mel leil dder jiuxl wo a; nael ngo leil ddar-nr-zzi su ca mel leil zuixl dixl gger nia. ¹⁷ Ngo leil ddarzzi su ca mel murgurgurmo ddoddomo hal mel bei var: ngo ddei mi ddei leil koxl dae a neir ggaxr cexr; armael noni wo nr xie ddar hal mel te var; ¹⁸ sae ssu cexr; duxr zza hal mel dda a lei yar leil cirdoxr lei bei no gger nr var; yar leixrhher ddei ca no su mel leil ta a, no su ca mel dder kor var.”

Yisu Merlabbor Ddeix

¹⁹ Seirpor Yisu yaa dax ddar biar jjia ho a, yar leil dder merlabbor zi deix si a, Arbosobo ddei yo piar a gga cux dae a. ²⁰ Yisu dax mae dae ca mel nael ssi a, zzarvul-zzarmae Yisu ddei ddar seirseir mel biar gger ssi a. Yaa biar gger dae car a, Seirpor Yisu lei yaa dax cirgo a miar bei dae,^w yel yaa leil ddoddomo hal mel bei lol, yel yaa ca leil biar gger dae ddar mel yarzi a ca mel leil saexl lol.

^w**16:20** Yisu mel Arbosobo ddei Xiu ddei leil sser dae a yaa dax cirgo a miar bei lol. Sirtuxrxixrzuaxl Sul 1-2 leil biar dae.